

Punja Meyasi mete yi Yesus Krist tedya

Yo Jan, mo tomun Yesus Krist kete sendi mekana mete yoko, yite a me tomba budfyate. A kети, yite a ke wete kiringira nde Patmos. Bo biyima nye ke tiko mate nda mo jobo keto lepina Kimo Tom Yesus Krist. Yo ke Patmos mate yi Kumande Yesus kwanma ne wete jaki wene yi tedye ne Jan meyasi mete yi ta kwanma ke siyna mboko ke. Jan ketima mekana maka kenje njon bekriten yitan jo yiba yi ba ke Asi ke ngimo te yite ke. Bo jebangwe meneti mete muka nde Turki.

Mekana mete lepi nda yi meyasi ta kwanma no ke siyna mboko kome Yesus Krist ta tonje meyasi hene ke. Yo ne budya sulna meyasi ke moy mekana maka. Yo ke lepo sendi kasi meluksa me Yesus Krist. Yeti se kasi pidya yotu te yi nye ba no yi bo lepe ke mekana me Kimo Tom Matiyo, Mark, Lukas ne Jan ke na.

Wuse yakama baka mekana maka ke mengabiye yitati:

1. Meyasi mete yi kwanama ke (kumte 1).
2. Meyasi mete yi kwanma ndana ne metom mete yi Nyangwe Kumande kenje menjon me bekriten yitan jo yiba ke (kumte 2-3).

3. Meyasi mete yi ta nje kwan̄na ké (kumte 4-22).

¹ Mɛkana mete yɔkɔ ke tedye meyasi mete yi b̄a sɔdyate mbombu yi Yesus Krist punja ké. Njambiyɛ nya nyɛ say te yi punjɛ meyasi menɔri yi yâkan̄gwe dya nɛdɔ ké, na tedye botu be mesay benɛ. Dete, Yesus Krist tomma jaki wene yi punjɛ nɛ yo nyɛ mɔ mesay wene Jan. ² Jan yekidya meyasi hene te yi nyɛ bɛn̄ma ké. A lɛpima nde, yo gbate mɛlɛpi mɛ Njambiyɛ yi Yesus Krist te mɔ te ɛ duw̄a yo nɛ n̄gbak n̄gbak kɔ punja nyɛ nyɛ ké. ³ Mɛkana maka ke punjɛ meyasi mete yi ta kwan̄na ké. Mɔ te ɛ tɔlɛ mɛlɛpi mete yi nyɛ bɔmɔ kɔ nɛ mesosa. Botu bɛte be lɛngwe mɛtɔ bakidye mɛlɛpi mete yi diyɛ ketinate ke mɔy mɛkana baka nɛ mesosa sendi, keto n̄gimɔ sima wuta.

Jan ke nyɛnɔ bekriten be Asi

⁴ Yo mi Jan kete mɛkana maka kenjɛ menjɔn̄ yitan jɔ yiba mɛ botu bɛte be tike temɔ ke yi Yesus yi diyɛ ke Asi ké. Njambiyɛ kɛl̄ n̄gikwa nɛ wunɛ, nyɛ sendi wunɛ tɛte. A ndana kete, a b̄a kwey kete, a ke nje sendi. Mɛsisiñ Njambiyɛ yitan jɔ yiba be diyɛ ke mbombu siya bekumande nɛ baka kɛl̄ sendi n̄gikwa nɛ wunɛ, nyɛ sendi wunɛ tɛte. ⁵ Yesus Krist te ɛ lɛpɛ meyasi mete yi nyɛ bɛn̄ɛ nɛ n̄gbak n̄gbak kɔ kɛl̄ sendi n̄gikwa nɛ wunɛ, nyɛ sendi wunɛ tɛte. Nyɛ bosa mɔ te ɛ womiya ke njoka bɛmun̄. Nyɛ kum bekumande be menɛti maka. A kwadya wuse, sɔn̄ɛ wuse ke diyɔ bala mɛbɛyɔ musu nɛ mɛkiyɔ

menε. ⁶ A kelma nde, wuse bêki ndingele kando bekumande, be sendi botu be nyena sadaka nye Njambiyε te Sangwe wene. A bêki ne luksa nε ngunḡudye kpo ne kpo, *amen. ⁷ Ne bêna, a yima ke njoka mekulutu! Bomɔ hene ta beḡe nye, ko botu bete be lonma nye ne kɔ punje baka. Mekando me bomɔ ke to meneti hene ta jaba kola keto ne. I, meyasi ta kwanḡa gbate dete, amen. ⁸ Njambiyε te Baba Mbokɔ ke lepɔ nde: «Yo mi alfa*f1* nε omega.*f1*» A kete ndana, a bɔ kwey kete, a yima, a ne ngunḡudye hene!

Yesus ke punje yotu nye Jan

⁹ Yo mi Jan te maḡ wun, wuse sangwate sine be Yesus. Yo dete, sine wune ke sangwa ne nyangwe mebonε. Sine wune hene ke namɔ. He ke kelo tin, wuse hene kε nɔ mbombu. Bo bonma mi bete ke wete kiringira nde Patmos, keto mi lepima mεlepi me Njambiyε, lepɔ sendi meyasi mete yi Yesus punja nye mi kε nye bomɔ. ¹⁰ Kimɔ Sisin dyanma mi ke yesɔ Nyangwe Kumande. E mi woke yiḡa nyangwe detina men ke kɔḡ mbe nda yi mumɔ tɔ ne dombiya kε. ¹¹ Men te lepima nde: «Yasi te yi we beḡe kε siki keto ke mekana, kenje menḡon yitan jɔ yiḡa me botu bete be tike temɔ ke yembe baka. Keto kenje njɔḡ botu bete be Efes, be Simirn, be Pergam, be Tiyatir, be Sardes, be Filadelfi nε be Lawodise.» ¹² Ndana, ε mi yeḡsa, nε mi beḡ mɔ te ε lepina nye mi kɔ. Ke mi ma yeḡsa kε, beḡa, meyasi me kasa lambo kete kε yitan jɔ yiḡa, yo bɔ hene tande lor. ¹³ Beḡa kε, yiḡa yasi nda gba mumɔ ke njoka meyasi menori. A bɔ ne sewna gambo ke yotu

nè kanda ke beti tandɛ lɔr. ¹⁴ To nɛ bɔ hɛnɛ wumnate nɛ mboŋ mboŋ nda ndɔmbɔ, yo bɔ nda su yombo. Misi mɛnɛ bɔ ke panɔ nda lam dɛtɛ. ¹⁵ Mɛkol mɛnɛ bɔ ke panɔ nɛ ŋgɛy ŋgɛy nda tunɟi te yi bo betɛ ke nyɛŋ nyɛŋ dɛtɛ kɛ. Mɛn nɛ bɔ nda mɛsokɔ mɛ nyangwɛ dɛku te ɛ ke sokula. ¹⁶ A bɔ nɛ bɛsisɔ yitan jɔ yiba ke mbam bo nɛ. Wɛtɛ ŋgwele ŋgwele kafa nɛ numbu te yiba bɔ ke pundɔ ke numbu nɛ. Mbɔmbu nɛ bɔ ke panɔ nda yol yesɔ sew. ¹⁷ Kɛ mi ma bɛŋɛ nyɛ kɛ, ɛ mi balɛ ke nɟi mɛkol mɛnɛ nda muŋ mumɔ. ɛ nyɛ kase mbam bo nɛ ke yotu mbɛ lɛpɔ ndɛ: «Wɛ tɪ kambi yaŋa na. ¹⁸ Mi dɛyɛ bosate, dɛyɔ sendi nɛnate. Mi yɔkɔ ɛ nɛ jɔŋ. Mi gwɔ nɛ mbɔmbu, ma bɛŋa, ndana mi ta dɛyɔ nɛ jɔŋ kpo nɛ kpo. Mi nɛ njanɟo te yi sɔŋ nɛ yi dɛya bɛmuŋ. ¹⁹ Dɛtɛ, kɛtɔ yasi te yi wɛ bɛŋma nɛ yikɛ yi wɛ bɛŋɛ ndana nɛ yikɛ yi ta nɛ kwanɟa kɛ. ²⁰ Wokɔ to yasi te yi bɛ sɔdɛyate ke kasi bɛsisɔ yitan jɔ yibate yi wɛ bɛŋma ke mbam bo mbɛ nɛ ke kasi mɛyasi mɛ kasa lambo kɛtɛ yitan jɔ yiba yi bɔ tandɛ lɔr kɛ. To tɛ dɛkɛ: Bɛsisɔ baka yitan jɔ yiba tɛdɛya bɛjaki bɛ Nɟambiye yitan jɔ yiba bɛ kɛndɛ nɛ mɛnjɔŋ yitan jɔ yiba mɛ botu bɛtɛ bɛ tike temɔ ke yɛmbɛ baka. Mɛyasi mɛ kasa lambo kɛtɛ yitan jɔ yiba ke tɛdɛya sendi mɛnjɔŋ yitan jɔ yiba mɛ botu bɛtɛ bɛ tike temɔ ke yɛmbɛ baka.»

2

Mɛkana mɛtɛ yi bɛŋɛ bɛkritɛn

bɛ Efɛs

¹ Ndana, ε μεν λεπε sendi nye mi nde: «Κετο μεkana kenje jaki te ε kende ne njon botu bete be tike temo ke yi Yesus ke Efes nde: Woko yasi te yi mo te ε ne besiso yitan jo yiβα ke mbam bo ne λεπε ke. Nye mo te ε kende ke njoka meyasi me kasa lambo kete yitan jo yiβα yi tande lor ke ke lepɔ nde: ² Mi duwa mekele mo, duwe nde, we ke gwe mesay. Mi duwa nde, we ne tin, duwe sendi nde, we ti yaka gbiso beya bomo na. Mi duwa nde, we bobuma botu bete be λεπε lepɔ nde, bo botu be tomun be Yesus baka, ε we beje nde, bo botu be ja, bo yeti botu be tomun na. ³ We ne tin, we sangwama ne mebɔne keto dino dyembe, ma we ti yokwe ke njime na. ⁴ Ko beko dete, mi ne yija yasi te yi mi ndeye we kete ke. Yo nde, we yeti ke kwadye se mi nda yi mbombu na. ⁵ Dete, yokidya misi beje mbej te yi we kopuma kete ke. Yensangwe temo yokwe ne koko jonna nda yi we dikima jonna ne mbombu ke. Ke ti be dete na, mi ta nje ke yo, mi ma soje yasi kasa lambo te wo ke mbej te, nge we ti yensa temo yokwe ne koko na. ⁶ Ma ko dete, we ne yija kimo mekele. Yo nde, we ke beno mekele me botu bete be bengwe tedya yasi te yi Nikola. Mi ke beno yo sendi.

⁷ «Mo te ε ne meto ko woku lepi te yi Kimo Sisij λεπε nye menjon me botu bete be tike temo ke yi Yesus baka! Mo te ε ta lajsa, mi ta nye nye mbumo jete te yi jongwe yi diye ke *Paradis Njambiyε ke nde, a dyaki.»

Mezana mete yi beje bekruten

be Simirn

⁸ Ε men nje lɛpɔ nde: «Κετο mekana kenje jaki te ε kende ne njɔn botu bete be tike temɔ ke yi Yesus ke Simirn nde: Wokɔ yasi te yi mɔ te ε diye bosate, diyo njenate kɔ lɛpe kɛ. Nye ε gwɔ ne mbombu nje be ne njɔn kɔ ke lɛpɔ nde: ⁹ Mi duwɔ nyangwe mebone mete yi we sangwa nɔ kɛ. Mi duwɔ mebuko mɔ, ko beko nde, we ne kusuku. Mi duwɔ sendi nde, botu bete be lɛpe ndi ne numbu nde, bo Beyuden, ase nde, bo yeti Beyuden baka ke diki lɛpɔ lɛpi gbutu sangwe ne we. Yo nde, bo njɔn botu bete be wokuna ne *Satan. ¹⁰ We ti kambi yanɔ ke mebone mete yi we ta sangwa nɔ kɛ na. Beɲa, *Kum beya mekele kɔ ta bete baɲa bomɔ ke jɔbo ke njoka yun yi boɓe ne wune. Wune ta sangwa ne nyangwe mebone yaka metu kamɔ. Ken ndi yo mbombu tiko temɔ ne ngbik, ko beko nde sɔɲ. Dete, mi ta nye we dɔngwe te yi tedye nde, we sima ju.

¹¹ «Mɔ te ε ne metɔ kɔ wɔku lɛpi te yi Kimɔ Sisij lɛpe nye menjɔn me botu bete be tike temɔ ke yembe baka! Ε nde: Mɔ te ε ta lanɲa kɔ ti sangwa se ne mebone me sɔɲ yibate ε ta nje kɔ na.»

Mekana mete yi beɲe bekriten

be Pergam

¹² Ke kɔɲte, ε men nje lɛpɔ sendi nde: «Κετο mekana kenje jaki te ε kende ne njɔn botu bete be tike temɔ ke yi Yesus ke Pergam nde: Wokɔ yasi te yi mɔ te ε ne ngwele ngwele kafa yi ne numbu te yiba lɛpe kɛ. Ε nde: ¹³ Mi duwɔ mbey te yi we diye kete kɛ. Yo mbey te yi *Satan name kɛ. Ma we ndi ke kɛ mbombu yi bakidye dino

dyembe jeliye. Sendi, we ò tone tikina temo te yi we tike ke yembe ké na, ko ke ngimo te yi bo woma ne Antipas te e lepima meyasi mete yi nye duwa ne ngbak ngbak ke kasi mbe nye bomo ké. Bo woku nye ndi ke mbey kome wune diye ké, ke mbey te yi Satan be ne mbey diyo ne ké. ¹⁴ Ko dte, mi ne yina yasi te yi mi ndeye we kete ké. Yo nde, we ne bana bomo ke yo be nye sosu ke yasi te yi *Balam dikima tedye Balak ké. A dikima tedye yasi te yi ta jatidye botu be kando Isarayel ke beya nje. A dikima tedye dte, né bo dye menjay mete yi bo kele ne sadaka nye bana benjamiye, nye bo sendi ke kelna mewanja. ¹⁵ Sendi, bana bomo bo ke kelo ndi njel kiya mekele mete. Bo nyéki yan sosu ke tedya yasi te yi Nikola tedye ké. ¹⁶ Ma, yensangwe temo. Nge ti be dte na, mi ta nje ke yo nedo, má lu dyambi ne bo ne kafa te yi ke numbu mbe ké.

¹⁷ «Mo te e ne meto ko woku lepi te yi Kimo Sisin lepe nye njon botu bete be tike temo ke yi Yesus baka! E nde: Mo te e ta lanja, mi ta nye nye yina medye te yi bo jeba nde *man yi diye sodyate ke dyobo ké. Mi ta nye sendi nye wete wumna tari te yi ne wete jonja dino ketinate kete. Mumo wete ne wete yeti ke duwe jonja dino te na, sonje ndi mo te yi bo nye nye dino te ko.»

Mekana mete yi beje bekiten

be Tiyatir

¹⁸ E men nje lepo nde: «Keto mekana kenje jaki te e kende ne njon botu bete be tike temo

ke yembe ke Tiyatir nde: Woko yasi te yi Monɔ Njambiyɛ, nye ɛ ne misi nda lam dɛte nɛ mekol nda tunji te yi pane ne ngɛy ngɛy kɛ lɛpɛ kɛ. ɛ nde: ¹⁹ Mi duwɔ mekele mɔ nɛ temɔ mekwadya mɔ, duwe nde, we ke tiko temɔ ke yembe. Mi duwɔ sendi nda yi we kɛ mbɔmbu yɛ tonjɛ ne mesay kɛ. Mi duwɔ tin yɔ, duwe nde, mesay mete yi we kele ndana kɛ buyɛ kwɔ yi mbɔmbu. ²⁰ Ko dɛte, mi ne yiɲa yasi te yi mi ndeye we kete. Yo nde, we ke tiko nya te yi bo jeba nde Jesabel ko nde, a kɛl mesay mɛnɛ lalɛ. Nye ne nguru wɛnɛ ke lɛpɔ nde, nye mɔ punja mɛlɛpi mɛ Njambiyɛ. A ke tedye meyasi yɛ jatidyɛ ne botu be mesay bembɛ ke beya nje. A kɛl dɛte, nɛ bo nye bo ke kelna mewanja, dɛye sendi menjay mete yi bo kele ne sadaka nye baɲa benjambiyɛ kɛ. ²¹ Mi nya nye ngimɔ yɛ ladyɛ nde, a yɛnsangwe temɔ. Ko dɛte, a yeti ke kwadyɛ yeɲsa temɔ tiko kelna mewanja mɛnɛ na. ²² Bɛɲa, mi ta betɛ nye ke taɲ kɔn. Mi ta tedye sendi nyaɲgwe mɛbɔnɛ nye botu betɛ be sangwa kelɔ wanjɔ ne nye baka, ngɛ bo dɛye kinɛ yeɲsa temɔ tiko mekele mɛnɛ na. ²³ Mi ta girise wo bɔnɔ bɛnɛ. Dɛte, menjɔɲ mɛ bɔmɔ hɛnɛ be tike temɔ ke yembe baka ta duwe nde, mi yɔko ɛ songile metake mɛ moy mumɔ, duwe yasi temɔ nɛ. Mi ta nye mumɔ hɛnɛ yasi ke njoka yun bɛngwe mekele mɛnɛ.

²⁴ «Ma wunɛ bukwe botu betɛ be tike temɔ ke yembe ke Tiyatir baka, wunɛ ti bɛngwe yun tedya yasi te yite, ho duwe yasi te yi bo jeba nde: <Dimna yasi te yi dɛye sɔdyate ke temɔ *Satan kɛ> na. Ke yun, mi yeti ke sobidyɛ se

wunε yiηa mapi na. ²⁵ Siya te ndi nde, wunε kômbila bakidyε yasi te yi bo tedya wunε ké nε gbem kumɔ ke ηgimɔ te yi mi ta nje ké. ²⁶ Mɔ te ε ta laηsa kelɔ mesay membe kumɔ ke siynate, mi ta nye nye deti te yi namɔ mekandɔ me bomɔ hene ke to meneti. ²⁷ A ta biye njambala te yi sumba namɔ nε bo, wanjo bo wete wete nda yi bo pote nε membe mete yi bo sa nε yekɔ ké. A ta be nε deti ndi nda yi Saηmbe nya mi ké. ²⁸ Mi ta nye sendi mɔ te sisɔ te ε pane nε kpalele ke njenameno kɔ.

²⁹ «Mɔ te ε nε metɔ kɔ wôku lepi te yi Kimɔ Sisiη lepe nye menjon me botu bete be tike temɔ ke yembe baka!»

3

Mekana mete yi beηe bekriten

be Sardes

¹ Ε men kε mbombu lepɔ nde: «Keto mekana kenje jaki te ε kende nε njon botu bete be tike temɔ ke yembe ke Sardes nde: Wokɔ yasi te yi mɔ te ε nε mesisiη Njambiyε yitan jo yiβα be diye ke mbombu wene lepe ké. A sendi nε besisɔ yitan jo yiβα. Ε nde: Mi duwα mekele mɔ. Bo ke lepɔ nde, we nε jon, ase nde, we me munte. ² Jemkwe, jelkwe bukwe yasi te yi ke si gwe ké, keto mi beηma nde, mekele mɔ yeti nε njololo ke mbombu Njambiyε wombe na. ³ Paη pa take nda yi we wokuma nε melepi me Njambiyε bu nε yo ké. Bakidyε melepi mete, yeηsa temɔ. Ma ηge we ti diye nε sɔsɔ na, yite mi ta nje pe yo nda mɔ gubɔ. We tí duwe ηgimɔ te yi mi ta

nje nɔgbake we kete ké na. ⁴ Ko dɛte, we ne ɔaɔa ɔomɔ ke Sardɛs be ti nye mɛmi ke mɛlamɔ man na. Bo ta lenje wumna mɛlamɔ, sine ɔo má kɛndɔ nɔ, keto jonɔwe dyan yakama nde, ɔo kɛl ne ɔo dɛte. ⁵ Dɛte, mɔ te ε ta laɔsa, ɔo ta lenje nye wumna mɛlamɔ. Ko mi tí soɔe dɛno dɛyɛ ke mɛkana mɛte yi jonɔwe na. Mi ta jaye ke mbɔmbu Saɔmbe nɛ ke mbɔmbu ɔejaki ɔene nde, nye mumɔ wombe.

⁶ «Mɔ te ε ne mɛto kɔ wɔku yasi te yi Kimɔ Sisiɔ lɛpe nye mɛnɔɔn mɛ ɔotu ɔete ɔe tike temɔ ke yembe ɔaka!»

Mɛkana mɛte yi ɔene ɔekritɛn

ɔe Filadɛlfi

⁷ E mɛn lɛpe nde: «Keto mɛkana kɛnje jaki Njamɔiyɛ te ε kɛnde ne nɔɔn ɔotu ɔete ɔe tike temɔ ke yi Yesus ke Filadɛlfi nde: Wokɔ yasi te yi mɔ te ε kɛne sɛmɔ lɛpe ké. Nye sendi mɔ te ε gbakasi. A ne njanɔo Kumande Davit. Nge nye ɔute numɛy, kɛne mumɔ wɛte ne wɛte yakama dɛɔo na. Nge nye dɛbe, kɛne mumɔ wɛte ne wɛte yakama ɔute na. E nde: ⁸ Mi duwɔ mɛkele mɔ. ɔɛɔa, mi ɔutuma numɛy tikɔ nyase ke mbɔmbu wɔ, kɛne mumɔ wɛte ne wɛte yakama dɛɔo yo na. Mi duwɔ nde, we yeti ne dɛti pɔke na. Ko dɛte, we kɔ ndi mbɔmbu ɔakidɛye mɛlɛpi mɛmbe, we ti tone mi na. ⁹ Dɛte, ɔɛɔa, mi ke kanɛ ɔaɔa ɔomɔ ke njoka nɔɔn ɔotu ɔete ɔe wokuna ne *Satan ɔaka nye ke mɔy mɛɔo mɔ. Bo ke kelɔ ja lɛpɔ nde, ɔo Beyudɛn, ase nde, ɔo yeti Beyudɛn na. ɔɛɔa, mi ta kelɔ nde, ɔo njâki nje

kuse meɓɔŋ ke nji mekol mɔ. Dete, ɓo ta duwe nde, mi ke kwadye we. ¹⁰ We ɓakidyɛ lɛpi te yi mi lɛpima nye we nde: Kelo tinj kɛ nɔ mbombu kɛ. Dete, mi sendi, mi ta ɓakidyɛ we ke ŋgimɔ te yi meɓobilan ta nje ke ndiŋgele meneti maka yɪ ɓobe ne ɓomɔ hene ɓe diyɛ ke to meneti ɓaka. ¹¹ Mi yima nedɔ! Kombila ɓakidyɛ yasi te yi ɓo tedya we kɛ ne gɓem, kambɔ mumɔ me nje ɓu dɔŋgwe yɔ. ¹² Mɔ te ε ta laŋsa, mi ta tembidye nye nda konu ke moy mbanjo Njambiyɛ wombe, ko a tɪ pundɔ se kɛ womaŋa na. Mi ta ketɔ dɪno Njambiyɛ wombe nɛ dɪno dya Njambiyɛ wombe ke yotu nɛ. Dya te, yo jonja Yerusalem te yi piye wule dyoɓɔ ke kekɪ Njambiyɛ wombe kɛ. Mi ta ketɔ sendi jonja dɪno dyembe ke yotu nɛ.

¹³ «Mɔ te ε ne metɔ ko wɔku yasi te yi Kimɔ Sisiŋ lɛpe nye menjon me ɓotu ɓete ɓe tike temɔ ke yembe ɓaka!»

Mekana mete yi ɓeŋe ɓekriten

ɓe Lawodise

¹⁴ ε men lɛpe nde: «Ketɔ mekana kenje jaki te ε kendɛ ne njon ɓotu ɓete ɓe tike temɔ ke yembe ke Lawodise nde: Woko yasi te yi Mɔ te yi dɪno dyene nde *Amen lɛpe kɛ. Nye yɔko ε lɛpe meyasi mete yi nye ɓeŋe ne ŋgbak ŋgbak, nye sendi gbakasi. Nye mɔ te yi Njambiyɛ kwanma ne nye yɪ kusɔ ne mbokɔ. ε nde: ¹⁵ Mi duwɔ mekele mɔ. Mi duwɔ nde, we yeti weynate ne jiriri ho dɪkinate ne kpaɓɛŋ na. Biran nde, ɓekɔ ne jiriri ho ne kpaɓɛŋ. ¹⁶ Dete, nda we ne ɓisbis, we yeti ne jiriri ho ne kpaɓɛŋ kɛ, mi ta jo we li.

¹⁷ Ma we ne nguru ke lepo nde, we mo kusuku, we ma ndemo kusuku yaka. 'We ke lepo sendi nde, we ta sa sendi nge? Ndi nde, we yeti ke duwe nde, we ne ngwete, we ke moy jarapa, we ke buko, misi mo dɔɔinate, sendi, we sokere na. ¹⁸ Dete, mi ke kite we nde: Bomo lor te yi bo sima beɲe boɔe ke dɔte kɛ ke bo mbe. Kelo dɔte, nɛ we be ne kɔpasa kusuku. Bomo wumna melambo ke bo mbe, nɛ we leɲ peto ne yotu yo, kambɔ bomo me nje beɲe sokere yo nye ne we njon. Nɛ we bɔm sendi nyeti misi dɔɔɔye ke misi mo, nɛ we beɲna. ¹⁹ Mi ndeya mbe tedye meɔone nye bomo hene be mi kwadɔye yɛ kite ne bo. Ma dɔte, nyeko temo yo hene ke mesay, yeɲsa sendi temo. ²⁰ Beɲa, mi ke tɛri ke numey ke duɲgwɛ. Nge mumo woke men mbe bute numey, mi ta nyiɲe tɔ dɔyene, nɛ mi nɛ nye, he ta dɔyena wete. ²¹ Mo te e ta laɲsa, mi ta jaye nde, sine nye dɔy ke siya bekumande mbe nda yi mi ne nguru wombe laɲsama no sendi, nje kwɔ dɔyɔ metidɔye sine Saɲmbe ke siya bekumande ne kɛ.

²² «Mo te e ne meto ko woku yasi te yi Kimɔ Sisiɲ lepe nye menjon me botu bete be tike temo ke yembe baka!»

4

Kanna te yi bo kane ne Njambiye

ke dɔyobo kɛ

¹ Ke koɲ meyasi menori, ke mi ma kane misi, beɲa, wete numey nyase ke dɔyobo. E mi woke men te yi ma lepinangwe ne mbombu nye mi kɛ. Men te lumsama nda yi mumo tɔ ne dombiya kɛ.

Ɛ men te lɛpɛ nyɛ mi nde: «Bendo nje wonɔa, nɛ mi tedye wɛ meyasi mete yi yákanɔwɛ dya ke kɔntɛ yiri ké.» ² Ke kiya ngimɔ te ɛ Kimɔ Sisiɔ dya mi, ɛ mi beɛɛ wete siya bekumande ke dyaɔɔ nɛ wete mumɔ metidye kete. ³ Mbombu mɔ te ɛ ba metidye kete kɔ ba ke panɔ nɛ ngɛy ngɛy nda kɔpa siya tari nde japi nɛ sɔrdiyɔɔ. Yiya yasi nda yi lumbu te nɔ ké linja siya te. Yo ba ke panɔ nda kɔpa wete tari nde emerod.

⁴ Yiya mesiya bekumande kaba jo yini linja siya bekumande te yɔru. Betomba kaba jo yini ba metidye ke mesiya menɔri. Bo ba nɛ wumna melambo ke yotu nɛ meɔɔngwɛ ke to tande lɔr. ⁵ Yesi mbiyɔ dikima pundo ke siya bekumande te. Memen nɛ lum mbiyɔ dikima wule sendi mate. Melambo yitan jo yiba dikima panɔ nɛ kpalele ke pulɔ mbombu siya te. Melambo mete, yo mesisiɔ Njambiyɛ yitan jo yiba.

⁶ Yiya yasi ba ke mbombu siya bekumande te nda maɔ. Yo ba nɛ ngɛlele, panɔ nɛ ngɛy ngɛy nda wete wumna tari nde kirisital. Yiya jonjonɔwɛ meyasi yini linja siya bekum yinɔri tiko ke bembe. Be jonjonɔwɛ meyasi menɔri ba nɛ memisi nɛ kamtana ke yotu hɛnɛ pulɔ mbombu nɛ pulɔ kɔɔ. ⁷ Bosa jonjonɔwɛ yasi boɔnama nɛ dila. Yibate boɔnama nɛ mɔnɔ nday. Mbombu te yi yitatite boɔnama nɛ yi mumɔ. Jonjonɔwɛ yasi yinite boɔnama nɛ mbele te ɛ ke je kɔ. ⁸ Jonjonɔwɛ yasi hɛnɛ ke njoka be jonjonɔwɛ meyasi maka yini ba nɛ mepapɔ yitan jo wete. Bo ba nɛ memisi nɛ kamtana ke yotu hɛnɛ pulɔ puyɛ nɛ ke nji

mepapo. Tu ne yeso bo ti be ne ngimo mewedya na, say yan ndi lepinate nde: «Kiyɔ, kiyɔ, kiyɔ! Njambiyɛ te Baba Mboko ɛ ne ngungudye hene ko kiyɔ! A ba kwey kete, a ndana kete, a yima!» ⁹ Be jonjongwe meyasi maka yini dikima jembina lukse mo te ɛ ke metidye ke siya bekumande ko. Bo dikima ngane, nye wosoko nye nye, mo te ɛ diyɛ kpo ne kpo ko. ¹⁰ Mengimo hene te yi bo kele dete ke, betomba baka kaba jo yini ke kuse meboɔ koɔ mbombu ke meneti ke mbombu mo te ɛ ke metidye ke siya bekumande ko. Bo ke kano yoko ɛ diyɛ kpo ne kpo ko, soɔe medungwe man ningwe ke mbombu siya bekumande te lepo nde: ¹¹ «Baba Mboko te Njambiyɛ wusu, yo yakama nde, bo lɔksa we, bo ngana we, bo dukwe nde, we ne ngungudye, keto yo we kuse meyasi hene! We kwadye nde, meyasi mete beki kete, ɛ we kuse ne yo.»

5

Mɔno Sam ke bute mekana mete

yi ba ndadyate ke

¹ Ke kɔɔte, ɛ mi beɔe wete mekana ke mbam bo mo te ɛ ba metidye ke siya bekumande ko. Yo ba ne meketi ke moy te ne ke kɔɔ te. Bo ndadya yo ne meyasi me ndadya yasi yitan jo yiba nda dangi. ² ɛ mi beɔe wete detina jaki Njambiyɛ ke pele ne men ke kwey nde: «Nda yakama pake meyasi me ndadya yasi bute mekana maka ko?» ³ Ma ko mumo wete ne wete ke dyobo ko ke meneti ko ke nji meneti ti be ne deti te yi bute mekana beɔe yasi te yi ke moy te ke na. ⁴ ɛ mi

gboŋgile dukwe, keto kine mumo wete ne wete yakama bute mekana beŋe yasi te yi ke moy te ke na. ⁵ E wete tomba ke njoka betomba baka lepe nye mi nde: «We ti lel na. Beŋa, dila te e kando Yuda, njuku jeti te yi moy tu Davit laŋsama yasi hene. A ta pake meyasi me ndadya yasi yitan jo yiba, bute mekana.»

⁶ E mi beŋe wete *Momo Sam deke nda bo kilma ngin ne yi kelna sadaka. A ba ke bembe siya bekumande. Be joŋjoŋwe meyasi maka yini ne betomba baka linja nye tiko ke bembe. A ba ne melako yitan jo yiba ne memisi yitan jo yiba. Memisi mete, yo mesisiŋ Njambiyē yitan jo yiba be nye tome kenje ke to meneti maka hene ke. ⁷ E Momo Sam ko kwa ke bu mekana mete yi ba ke mbam bo mo te e ba metidye ke siya bekumande ko. ⁸ Ke nye ma bu mekana menori ke, e be joŋjoŋwe meyasi maka yini ne betomba baka kaba jo yini kuse meboŋ ke mbombu wene. Bo hene ba ne yiŋa meyasi nda mekunda ke bo. Bo ba sendi ne mepelo tande lor tondunate ne yiŋa melobinda. Melobinda menori tedya mengweta me botu be Njambiyē. ⁹ E bo jembe wete jonja jembu lepo nde: «Yo we yakama bu mekana pake meyasi mete yi ndadye yo ke, keto bo woma we, e we kole bomo ne mekiyo mo. We kolma bomo ke njoka mboya bomo hene, kolo bomo ke njoka menumbu hene. We kolma bomo ke njoka mekando hene, kolo bomo ke njoka bomo hene ke to meneti. We kolma bo yi yokidye bo nye Njambiyē. ¹⁰ We kelma nde, bo beki kando bekumande nye Njambiyē wusu,

be sendi botu be nyena sadaka nye nye. Bo ta namo ke to meneti maka.» ¹¹ Ke konṭe, e mi sengile yasi, e mi woke men budya bejaki be Njambiye. Bo linja siya bekumande ke, linje be jonjongwe meyasi maka ne betomba baka tiko ke bembe. Buyo yan ba besanmay besanmay, betomay betomay. ¹² Bo dikima kembidya lepɔ nde: «Ke be *Mɔno Sam te yi bo woma ko, yakama nde, bomo dukwe nde, a ne ngungudye. Meyasi hene yo yene. Bo dukwe sendi nde, a ne dyanɔ ne deti. Bo ngana nye, lukse nye, sombile sendi nye.»

¹³ E mi woke meyasi hene te yi Njambiye kusuma, yike yi diye ke dyobo ne ke meneti ne ke nji meneti ne yi diye ke man. Mi wokuma meyasi mete hene ke lepɔ nde: «Wuse hene sɔmbila yoko e ke metidye ke siya bekumande ko bene *Mɔno Sam. Wuse ngana bo, lukse bo, duwe nde, bo ne deti kpo ne kpo.» ¹⁴ E be jonjongwe meyasi maka yini lepe nde: «*Amen!» E betomba baka kuse meboŋ koto mbombu ke meneti kanɔ yoko e ke metidye ke siya bekumande bene Mɔno Sam ko.

6

Mɔno Sam ke pake meyasi me ndadya

meyasi yitan jo wete

¹ Ndana, e mi sengile yasi, beŋa, *Mɔno Sam ke pake bosa yasi ndadya meyasi maka yitan jo yiɓa. E mi woke wete jonjongwe meyasi menori ke lepɔ ne men nda lum mbiyo nde: «Inja!» ² Ke mi ma kanɛ misi, beŋa, wete wumna yanɔ. Mo

te ε βα μεtidye ke to yanga te ko βα ne ndolo ke bo. Ε bo nye nye dɔngwe ke to, ε nye kwa ne yi nɔaɔ dɔyambi, na laɔsa laɔsaɔngwe kɛ nɔ mbɔmbu.

³ Ke Mɔnɔ Sam ma pake yiba yasi kɛ, ε mi woke jonjonɔngwe yasi yibate ke lepɔ nde: «Inja!» ⁴ Ε wete yanga punde ne hɔkɔ hɔkɔ nda dɛte. Bo nya mɔ te ε βα ke to yanga te ko dɛti te yi sonɛ tɛte ke menɛti maka, nɛ bomɔ wona tande yan. Ε bo bu wete nyanɔngwe kafa nye nye.

⁵ Ke Mɔnɔ Sam ma pake yitati yasi ndadɔya yasi kɛ, ε mi woke jonjonɔngwe yasi yitatite ke lepɔ nde: «Inja!» Ke mi ma kaɔe misi, beɔa, wete yindina yanga. Mɔ te ε βα μεtidye ke to ne ko βα ne kilo yekina meyasi ke bo. ⁶ Ε mi woke yiɔa men ke wule ke njoka be jonjonɔngwe meyasi maka yini lepɔ nde: «Mejɛɔ me kilo mbusa wete yakama ne buyɔ mɔni te yi bo gbo ne mɔ mesay ke yesɔ wete kɛ. Mejɛɔ me kilo lesi yitati nda yi kilo mbusa wete. Ma nɛ mutɔ nɛ menjam, tiko yite, we ti kpoka na.»

⁷ Ke Mɔnɔ Sam ma pake yini yasi kɛ, ε mi woke men te yi jonjonɔngwe yasi yinite. Ε nye lepɛ nde: «Inja!» ⁸ Ke mi ma kaɔe misi, beɔa, wete yanga ne fandafuye. Dɛnɔ mɔ te ε βα μεtidye ke to ne ko nde sɔɔ, dɔya bemuɔ βα ke kɔɔ ne. Ε bo nye bo dɛti te yi wo bomɔ. Ke njoka mɛpel me menɛti maka yini, bo nya bo dɛti te yi wo bomɔ ke ndingɛle pel te wete ne kafa, ne nje kolɔ, ne nje yiɔa beya giɔga mekɔn, ne nje benyamɔ nyan bete be dɔye ke to menɛti maka baka.

⁹ Ke nye ma pake yitan yasi ndadɔya yasi kɛ, ε mi beɔe mesisiɔ me botu bete yi bo woma baka.

Bo wóku bo keto mɛlɛpi mɛ Njambiyɛ, keto bo bɛngwa sendi yasi te yi Yesus tedya kɛ́. Mɛsisin man bɔ́ kɛ mbɛy kelna sadaka nyɛ Njambiyɛ pulo mɛkol mɛtɛ. ¹⁰ Ɛ bo kembidya dɛtinate lɛpɔ́ ndɛ: «Sa Mbokɔ́, wɛ kiyɔ́, wɛ yɔ́ gbakasi, wɛ ta ladɛyɛ kumɔ́ ndɛnɛn yí nje pɛsɔ́ nɛ jɔ́si botu bɛ mɛnɛti maka yí kundɔ́ nɛ mɛkiyɔ́ musu?» ¹¹ Ɛ bo nyɛ wumna gambo nyɛ mumɔ́ hɛnɛ kɛ njoka yan. Ɛ bo lɛpɛ nyɛ bo ndɛ, bo pân pa ladɛyɛ nɛ mbɛt, né buyɔ́ bɛnjɔ́n ban bɛ bɛnɛ bo keɛ mɛsay baka, buyɔ́ bɛman ban yi bo ta wo nda bo baka si tondu.

¹² Kɛ ngimɔ́ te yi *Mɔ́nɔ́ Sam pakima nɛ yitan jɔ́ wɛtɛ yasi ndadya yasi kɛ́, ɛ mi bɛɛɛ, ɛ mɛnɛti ngwanɔ́wa budɔ́yate. Ɛ yesɔ́ yɛnsa bɛ yindinate nɛ finfin nda yindina lambɔ́ bɛkusɔ́. Ɛ ndingɛɛ ngwɛndɛ hɛnɛ yɛnsa bɛ tenate nda mɛkiyɔ́. ¹³ Ɛ bɛsisɔ́ ketiyɛ kɛ dɔ́yɔ́bɔ́ balɔ́ kɛ mɛnɛti nda yi mɛpinɔ́ balɛ nɔ́ nɛ kpɛn kpɛn kpɛn komɛ nyangwɛ pupɔ́ kwɔ́ kɛ́. ¹⁴ Ɛ dɔ́yɔ́bɔ́ kwɔ́ yambile nda yi bo bɔ́yɛ nɛ mbɔ́ru mɛkana kɛ́ tikɔ́ kɛ́. Keki nɛ kiringira hɛnɛ dɔ́uwɔ́ kɛ mbɛy man. ¹⁵ Ko bɛkumandɛ bɛ mɛnɛti maka ko bɛ nyangwɛ bomɔ́ nɛ bɛkum bɛsɔ́ja ko botu bɛ kusuku ko ngabolo bomɔ́ ko bɛbala ko botu bɛtɛ bɛ yeti bɛbala baka, bomɔ́ hɛnɛ kwanɔ́ma kɛ́ sɔ́ma kɛ moy mɛnguku nɛ kɛ gule gule mɛtari kɛ mɛkɛki. ¹⁶ Ɛ bo lɛpɛ nyɛ mɛkɛki nɛ gule gule mɛtari ndɛ: «Wunɛ bál kɛ to su sɔ́dɛyɛ wusɛ sɔ́nɛ kɛ mbɔ́mbu yɔ́kɔ́ ɛ dɔ́iyɛ mɛtidɛyɛ kɛ siya bɛkumandɛ kɔ́. Wunɛ sɔ́dɛyukwɛ wusɛ, kambɔ́ ngambi *Mɔ́nɔ́ Sam mɛ nje biyɛ wusɛ. ¹⁷ Keto nyangwɛ yesɔ́

ngambi yan dyanma, ma nda yakama sumo kol ko?»

7

Bomo 144.000 be Njambiyε pesima

nde, bo ta be bene baka

¹ Ke kɔnte, ε mi beɛe baɛa bejaki be Njambiyε yini ke teri yaka ne meɓoku me meneti maka yini. Bo tembidiya mepupɔ yini te yi kwɔ ke to mboko kε, kamba pupɔ wete ne wete me nje kwɔ ke to meneti ko ke maɲ, ho wumbidiye wete jeti. ² ε mi beɛe sendi wete jaki Njambiyε ke wule kome yeso punde kε. A ba ne yiɲa yasi nda ngembiyε te yi Njambiyε te ε ne joɲ ko ke bo. ε nye kembidiya detinate kenje bejaki yini bete be Njambiyε nya bo deti te yi bekidiye meneti nε maɲ baka. ε nye lepe nye bo nde: ³ «Kpe, ne ti bekidiya ko meneti ko maɲ ko mejeti na, kumo ke ngimo te yi wuse ta pa si nye ngembiyε ke mbombu botu be mesay be Njambiyε wusu.» ⁴ ε mi woke buyɔ botu bete yi bo nya ngembiyε ke mbombu yan baka. Bo ba hene bomo tomay gomay wete nε bomo tomay kamoni jo yini (144.000) ke njoka mekando me botu be kando Isarayeɛ hene. ⁵ Ke kando Yuda, bomo tomay kamo jo yiɓa. Ke kando Ruben, bomo tomay kamo jo yiɓa. Ke kando Gad, ndi dete sendi. ⁶ Ke kando Aser, bomo tomay kamo jo yiɓa. Ke kando Neftali, ndi dete sendi. Ke kando Manase, bomo tomay kamo jo yiɓa. ⁷ Ke kando Simeyɔɲ, ndi dete sendi. Ke kando Levi, bomo tomay kamo jo yiɓa. Ke kando Isakar, ndi

dete sendi. ⁸ Ke kando Sabulon, bomɔ tomay kamɔ jo yiba. Ke kando Yosep ndi sendi dete. Ke kando Benjamɛ, bomɔ tomay kamɔ jo yiba. Bo nya ngembiye ke mbombu botu benɔri hene.

Nyanɔwe ngil bomɔ

⁹ Ke kɔŋ te yinɔri, ε mi beɛe nyanɔwe ngil bomɔ. Yeti yasi te yi mumɔ yakama tolɔ na. Botu bete wɔla ke njoka bomɔ hene be diye ke to meneti baka. Bo wɔla ke njoka mboya bomɔ hene, wule ke njoka mekando hene, wule ke njoka mboya menumbu hene. Bo ba ke teri ke mbombu siya bekumande nɛ ke mbombu *Mɔnɔ Sam. Bo ba ne wumna megambo ke yotu nɛ mbɔru mebaɲa ke mebo. ¹⁰ Bo dikima kembidya detinate lepɔ nde: «Yo Njambiye wusu ε ke metidyε ke siya bekumande kɔ jonɔwe wuse bene Mɔnɔ Sam.» ¹¹ Bejaki hene ba ke teri linje siya bekumande, linje sendi betomba nɛ be jonjonɔwe meyasi maka yini. Bo kusa meboɲ kɔtɔ mbombu ke meneti ke mbombu siya bekumande kanɔ Njambiye ¹² lepɔ nde: «*Amen! Wuse sɔmbila lukse ngane Njambiye wusu, nye nye wosoko kpo ne kpo. He dukwe nde, a ne dyanɔ nɛ ngunɔdye nɛ deti kpo ne kpo, amen.»

¹³ E wete ke njoka betomba benɔri bu lepi lepɔ nye mi nde: «Botu bete be ne wumna megambo baka be nda? Bo wɔla we nje nɔ?» ¹⁴ E mi yeɲsa nye nye nde: «Baba, yo we duwe.» E nye lepe nye mi nde: «Yo baka be sanɔwama ne meboɲ ke ngimɔ nyanɔwe meboɲ te yi kwanama kɛ. Bo weyma megambo man nje pupudye yo ne bu ne mekiyɔ me *Mɔnɔ Sam. ¹⁵ Yo yite kele nde, bo

têma ke mbombu siya bekumande te yi Njambiye kelo mesay nye nye tu nè yeso ke moy mbanjo ne. Yoko e ke metidye ke siya bekumande ko ta gukule bo ke moy dakwe dyene. ¹⁶ Ko bo ti gwe se nja ho yesidye wete yeso na. Ko yeso ko kwalo jon hene ti lodye se boromo yan na, ¹⁷ keto Monó Sam te e ke metidye ke bembe siya bekumande ko ta daló bo ngboso bo ke no ke menge mete yi ne moroku mete yi nye jongwe ké. Njambiye ta titó misidye hene soje ke misi man.»

8

Mono Sam ke pake yitan jo yiba yasi

ndadya meyasi

¹ Ke *Monó Sam ma pake yitan jo yiba yasi ndadya yasi ké, e yasi hene be ne gbilik ke dyobo kelo nda kum hawa wete. ² E mi beje bejaki be Njambiye yitan jo yiba be diyé temnate ke mbombu wene baka. E bo kaje medombiya yitan jo yiba nye bo. ³ E wete jaki Njambiye ke pundó sendi. A ba ne wete pan ke bo tande lor. Bo diki lodye lobinda kete yi kelo ne sadaka nye Njambiye. E nye kwa ke teme ke to mbey te yi bo diki kelo sadaka kete nye Njambiye ké. E bo nye nye budya melobinda, na lodye, sangwe ne mengweta me botu be Njambiye hene. A ta lodye yo ke mbey kelna sadaka nye Njambiye yi tande lor yi diyé ke mbombu siya bekumande ne ké. ⁴ E yidyé melobinda menori sangwe ne mengweta me botu be Njambiye yi diyima ke mebo me jaki Njambiye ké bende kumo ke yi Njambiye. ⁵ E

jaki Njambiye bu pan lobinda yinori, bu dite ke mbey nyena sadaka nye Njambiye tonje kete, bete kenje ke to meneti. Ke nye ma bete yo dete ke, e mbiyo lume budyate, e memen punde, e yesi mbiyo yese budyate, e meneti ngwanngwa sendi. ⁶ E bejaki be Njambiye yitan jo yiba be ba ne medombiya yitan jo yiba baka komsa, ne bo to dombiya.

Bejaki be Njambiye ke to medombiya

⁷ E bosa jaki to dombiya. E metari ne dite sangwate ne mekiyo nukudya ke to meneti. Meneti bakama ke mepel yitani, e ndingele pel te wete si lolo gbeso ne mejeti bu besi membunjo hene te yi ba kete ke.

⁸ E jaki yibate to dombiya. E bo bu yija jonjon yasi nda nyanngwe keki te yi dite diye kete ke bete ke man. E man baka ke mepel yitani, e pel te wete yensa be tande mekiyo. ⁹ E meyasi hene te yi diye ne jon ke man ke baka ke menjon yitani, e ndingele njon te wete si gwe. E buyo mekuka hene te yi kende ke man ke baka ke mengabiye yitani, e bo si bekiye ndingele ngabiye te wete.

¹⁰ E jaki yitatite to dombiya, e wete jonjon nyanngwe sisjo nda nyan wule dyobo balo ke to meduku ne mendon buse ngabiye te wete ke njoka mengabiye mete yitani. ¹¹ Dino sisjo te nde Pekeke yasi. E ngabiye moroku wete ke njoka mengabiye mete yitani si jo ne pekeke. E bomo budyate gwe keto pekeke moroku yinori.

¹² E jaki yinite to dombiya te wene. E pel yeso wete si dimo bukwe mepel mete yiba. E pel ngwende wete si yindo bukwe mepel mete

yiba. E besisɔ hene baka ke menɔgabiye yitati, e ndingele ngabiye besisɔ wete si yindo. Meyasi menɔri hene yitati bakama ke menɔgabiye yitati tati. Yo kwanɔnama dete, ne ngabiye wete ke njoka menɔgabiye yitatite yi meyasi menɔri hene si dim. E ndingele ngimo hene te yi yeso dikɩ panɔ kete ke dyobo wete ke bakina ke menɔgabiye yitati. E ndingele ngabiye te wete kwanɔna ke moy yitil. Sendi, e ndingele ngimo hene te yi ngwende dikɩ panɔ kete ke tu wete ke bakina ke menɔgabiye yitati. E ndingele ngabiye te wete kwanɔna ke moy yitil.

¹³ Ke mi ma senɔgile yasi, beɔa, wete mbele ke je ke kwey ne mbiyɔn. Mi wokuma nda yi nye dikɩma kembidya lepo nde: «O meɔone wa! O meɔone wa! O meɔone ne botu bete be diyɛ ke meneti maka baka kome men medombiya ta lumsa ke ngimo te yi bukwe bejaki bete bari betati ta to medombiya ke wa!»

9

Jaki yitante ke to dombiya

¹ E jaki yitante to dombiya. E mi beɔe wete sisɔ te e wulma dyobo balɔ ke meneti ko. E bo nye sisɔ te njanɔ te yi bute ne numey te yi hebebe gbɔnɔnɔ ndon. ² E nye bute numey te, e yidyɛ timbila pundo kete nda yidyɛ te yi wule ke nyanɔgwe dite te yi bo lombɛ ke. E misi me yeso dibina ne likap, e yasi hene be tande yitil ne gir ne yidyɛ ndon yinɔri. ³ E bedolo punde ke yidyɛ yinɔri memiye meneti. E bo nye bo deti nda yi belel kolo bete be meneti maka. ⁴ E bo lepe nye

bo nde, bo tí kpoka ko mbunjo wete ne wete ke to meneti, ko yaña te yi lo, ko jete wete ne wete na. Yasi wete, bo kél beya yasi ndi ne botu bete be kine ngembiye Njambiyé ke mbombu yan baka. ⁵ Bo tí nye bo deti te yi wo bomó wokó na. Yasi wete, bo nya bo deti te yi tedye bo mebóne yaka menngwende yitan, mebóne mete ta be nda yi mumó sangwa nó ke ngimó te yi lel koló to ne nye ké. ⁶ Ke buyó metu mete yite bomó ta są nde, sọñ bíya bo. Ko dete, sọñ tí wuta ke keki yan na. Bo ta goro gwe, ma yasi wete, sọñ ta londó londó ne bo. ⁷ Bedóló bete bą nda beyanga bete yi bo kobile bo yi kè nó dyambi. Bo bą ne meyasi ke to nda medunngwe mete yi bo kele ne lor ké. Membombu man boñnama ne yi bomó. ⁸ Nyinjo to yan bą nda yi bomari. Mesu man bą nda yi bedila. ⁹ Bo bą ne yin meyasi ke beti nda lambó sumba te yi mumó lenje kè nó dyambi ké. Duñ mepapo man bą nda duñ mematuwa mete yi tandé sumba yi budya beyanga dale ne sokó kè nó dyambi ké. ¹⁰ Mekondu man bą nda yi belel koló, bo tóku bomó nda bo sendi. Deti mebóne mete yi bo ta tedye bomó yaka menngwende yitan ké wúla ke mekondu man. ¹¹ Kumande wan, yo beya jaki te ε diye ne hebebe gbonjo ndon ko. Bo jébangwe nye ke numbu Hebere nde Abadon, ke numbu Grék nde Apoliyon. ¹² Bosa mebóne yori yi sima kwą ké. Ma bukwa mebóne yifa yi ta dya ke konje ké.

Jaki yitan jo wetete ke to dombiya

¹³ ε jaki yitan jo wetete to dombiya. ε mi woke men ke wule ke mbey nyena sadaka nye

Njambiyε yi d̄iyε ke mbombu Njambiyε yi b̄a tandε lor k̄ε. Yo wulma ke m̄εboku mete yini. ¹⁴ M̄en te lep̄ima nyε jaki yitan j̄o w̄etete ε b̄a n̄ε d̄ombiya k̄o nde: «Wunja b̄ejaki yini te b̄e d̄iyε wotunate ke k̄eki nyangwε d̄uku te yi bo jeba nde Efrat k̄o.» ¹⁵ Ε bo wunje b̄ejaki yini b̄ete b̄e Njambiyε t̄embidya bo ȳi l̄adye n̄ε yasi te yi bo ȳakangwε kel̄o ke ηgbak ηgbak hawa te yi yes̄o te, yi ηgwende te n̄ε yi sew te yi b̄a kponate k̄ε. Bo b̄akima b̄om̄o ke m̄enj̄on yit̄ati. Bo wunjuma b̄ejaki b̄aka, n̄ε bo k̄ε wo b̄om̄o ke nd̄inḡele n̄j̄on b̄om̄o wete ke njoka m̄enj̄on maka yit̄ati. ¹⁶ Mi wokuma buȳo botu b̄e lojna d̄yambi b̄e b̄a ke to b̄eyanga b̄aka. Buȳo yan b̄a b̄emiliȳon gomay yiba. ¹⁷ Ke m̄oy yasi te yi mi b̄a ke b̄en̄ε nda nyen̄o k̄ε, mi b̄en̄ma b̄eyanga n̄ε botu b̄ete b̄e b̄a ke to yan b̄aka. Botu b̄ete b̄a n̄ε lamb̄o sumba ke yotu. Melamb̄o mete b̄a n̄ε hun̄ge hun̄ge nda d̄ite. Yo b̄a n̄ε biȳo biȳo, b̄e sendi b̄elnate nda poȳo. To b̄eyanga b̄ete b̄a nda yi b̄edila. Dite n̄ε yid̄ye n̄ε yija yasi nda piti d̄ikima pund̄o ke numbu yan. ¹⁸ Ε buȳo n̄j̄on b̄om̄o wete ke njoka m̄enj̄on mete yit̄ati s̄ombe s̄on ke m̄ekemiyε m̄en̄ori yit̄ati. Bo s̄ombuma s̄on n̄ε n̄je d̄ite, n̄ε n̄je yid̄ye, n̄ε n̄je piti te yi d̄ikima pund̄o ke numbu b̄eyanga k̄ε. ¹⁹ Yo nde, d̄eti b̄eyanga b̄ete w̄ula ke numbu yan n̄ε ke kondu yan. M̄ekondu man ke b̄on̄na n̄ε b̄enȳon̄je. Yo sendi n̄ε m̄eto k̄ete. Bo d̄iki kel̄o m̄εbeȳo n̄ε b̄om̄o n̄ε m̄eto man m̄en̄ori. ²⁰ Botu b̄ete b̄e t̄i s̄ombe s̄on ke m̄ekemiyε m̄en̄ori b̄aka t̄i ȳensa tem̄o tik̄o b̄eya m̄ekele man na. Ko bo t̄i tike

kanna beya mesisiŋ nɛ kanna meyasi mete yi bo dikima tuyɔ nɛ lɔr ho nɛ sumba ho nɛ yiŋa sumba sendi ké na. Ko bo tĩ tike kanna meyasi mete yi bo dikima kwakɔ kwakɔ nɛ tari ho nɛ jeti ké na. Bo kelma dɛte kɛ nɔ mbombu, ko beko nde, meyasi menɔri tĩ be nɛ dɛti te yi beŋe yasi, yi woko pɛ ho kendo na. ²¹ Ko bo tĩ yeŋsa sendi temɔ tiko kasi wona bomɔ ho kasi melembo ho kasi kelna mewanja nɛ kasi megubo man na.

10

Wete jaki Njambiyɛ nɛ mɔnɔ

mekana ke bo

¹ Ke konɛte, ε mi beŋe wete dɛtina jaki Njambiyɛ ke piye wule dɛyobo. A ba ke moy kulutu nɛ piyele. Lumbu ba yaka nɛ to nɛ. Mbombu nɛ ba ke panɔ nda misi me yeso. Mekol mene ba nda nyaŋgwe melam me dɛte. ² A ba nɛ wete mɔnɔ mekana butunate ke bo. A kaŋma kol te ε mbam bo tembidye ke to maŋ, nje kaŋe ε gare tembidye ke ŋgindi. ³ E nye kembidya dɛtinate nda yi dila betɛ nɛ men ké. Ke nye ma kembidya dɛte ké, ε lum mbiyɔ yitan jo yiɓa lumsa punje men yan. ⁴ Ke melum me mbiyɔ menɔri ma lumsa ké, ε mi diy keto. Ma yasi wete, mi nja woko wete men ke wule dɛyobo lepɔ nde: «Yasi te yi melum me mbiyɔ maka yitan jo yiɓa lepima ké, soɗyukwe yo nɛ gbɔl, kpɛ, we tĩ keti na.»

⁵ E jaki te yi mi beŋma ke teri, kol wete ke maŋ, kol wete ke ŋgindi ko kaŋe mbam bo nɛ kenje kwey. ⁶ A kinjama nɛ dɛnɔ mo te ε diye kpo nɛ kpo. Nye ε kusuma dɛyobo nɛ meyasi mete

yi dīye kete, kuso meneti nè meyasi mete yi dīye kete, kuso sendi maṅ nè meyasi mete yi dīye kete ké. A kinjama lepɔ nde: «Dimbidya ṅgimɔ yeti se na. ⁷ Kome jaki yitan jo yibate ta bete men tɔ dombiya ké, Njambiyε ta tonje yasi te yi nye kpoma yi bɔ sɔfyate ne mbombu ké. A ta tonje yo beṅgwe Kimɔ Tom te yi nye lepima nye botu be mesay bene, botu be punja mɛlepi mene ké.»

⁸ E men te yi mi wokuma wule d̄yobɔ ké nje lepina ne kɔkɔ sendi nye nde: «Ken b̄y mɔnɔ mɛkana mete yi dīye butunate ke mɛbɔ mɛ jaki te ε ke teri, kol wete ke to maṅ, kol wete ke ṅgindi kɔ.» ⁹ E mi kè ke yi jaki lepɔ nye nye nde, a nyêki mi mɔnɔ mɛkana mete. E nye lepe nye mi nde: «Boṅgɔ yo menɔ, yo ta be jonate ke mɔy, ma ke numbu, yo ta be ne min min nda mutɔ mɛ jo.» ¹⁰ E mi b̄y mɔnɔ mɛkana mete ke bɔ jaki menɔ. Yo bɔ ne min min ke numbu nda mutɔ mɛ jo. Ma ke mi ma si menɔ ké, ε yo kpale be jonate ke mɔy. ¹¹ Ke kɔṅte, ε bo lepe nye mi nde: «Ken sendi kè punje yasi te yi Njambiyε lepe ke kasi yiṅa mɛkandɔ mɛ bomɔ budfyate, ke kasi mboya bomɔ budfyate ke to meneti, ke kasi bomɔ yaka ne budya menumbu mete yi bo lepe nè ke kasi bekumande budfyate.»

11

Botu be lepina mɛlepi mɛ Njambiyε yiba

¹ E bo b̄y yiṅa kum soṅ yi yekina yasi nye mi. E bo lepe nye mi nde: «Tɛma, yeko mbanjo Njambiyε. Yeko sendi mbey nyena sadaka nye

Njambiyε. Tɔlɔ buyɔ botu bete be kanε Njambiyε womεte baka. ² Ma wε tɪ yeki sɛ mbanjɔ Njambiyε na, tikɔ yo nε nyεk. Wε tɪ yeki yo na, keto Njambiyε kanma yo nyε mεkandɔ mε botu bete be yeti kε duwε nyε baka. Bo ta sɔpɪte natε dɣari kε yi Njambiyε tokuma kε yaka mεngwendε kamɔni jɔ yɪba. ³ Mi ta nyε dɛti te yi punjε mεlɛpi mεmbε nyε bɔmɔ bεmbε yɪba be bεnma duwε meyasi mεte yi mi kelma kε. Bo ta lɛnjε lambɔ te yi bεkusɔ yɪ punjε nε mεlɛpi mεte yaka mεtu tomay wεtε jɔ gɔmay yɪba jɔ kamɔtan jɔ kamɔ wεtε.» ⁴ Botu baka yɪba dɣiy kε mbɔmbu Baba Mbokɔ te ε namε mεnɛti maka kɔ. Botu bete, yo njuku *mεoliviye yɪba nε mεlambo yɪba. ⁵ Kε mbanja mɔ pendɔ kwadɣε kelɔ yɪja yasi kɔtute sunɣwε nε bo, ɔ bɛnja, dɪte kε pundɔ kε numbu yan girise mɔ te. Dete, njε mumɔ kwadɣε kelɔ yɪja yasi kɔtute sunɣwε nε bo, mɔ te ta sɔmbɔ sɔnj nε nje te yite. ⁶ Kε ndingεlε njimɔ te yi bo ta punjε mεlɛpi mε Njambiyε kε, bo yakama biye mbiyɔ kε dɣyɔbɔ nde, mbiyɔ tɪ nɔku na. Bo yakama kelɔ nde, mɔrɔku lɪngwε mεkiyɔ, kelɔ sendi nde, kwalɔ kemiye hεnε bɔl kε to mεnɛti kε njimɔ hεnε te yi bo kwadɣε.

⁷ Kε bo si lɛpɔ yasi te yi Njambiyε lɛpɪma nde, bo pɛla kε, komete, nyamɔ te ε ta pundɔ kε hebebe gbɔngɔ ndon kɔ ta lɣ dɣambi nε bo. A ta lanja bo wo bo. ⁸ Mεmunj man ta dɣyɔ kε nyangwε mbanjo nyangwε dɣya. Bo njgbaki Nyangwε Kumande wan ndi kε dɣya te. Bo kpɔl jeba dɣya te nde *Sɔdɔm, yɪja nde Ejɪpt. ⁹ Bɔmɔ ta njgbɔ nje bεnjε munj yan yaka mεtu yitati nε

kumte. Bo ta wule ke njoka kwalɔ bomɔ hene, ke njoka mboya bomɔ, ke njoka bomɔ hene ko bo lépi numbu te yen nè ke njoka mekando hene. Bomɔ tí jaye nde, bo pũmbu bo na. ¹⁰ Botu be meneti maka ta be ne mesosa, bo ta sosa kpesa keto sɔŋ yan. Bo ta nyena meyasi tande yan, keto botu be punja melepi me Njambiyɛ baka yiɓa jekima tedye bo meɓɔne budyate. ¹¹ Ke metu yitati ne kumte ma si kwɔ ké, ε Njambiyɛ wumbidyɛ sosu ne yi kele nde, mumɔ bêki ne jɔŋ ké ke yotu yan. ε bo temɛ. ε botu bete be beɲma bo baka gwe wɔ budyate. ¹² ε botu be punja melepi me Njambiyɛ baka yiɓa woke wete detina men ke wule dyoɓɔ lepɔ nye bo nde: «Wune bêndi nje wonga!» ε bo bendɛ kè ke dyoɓɔ ke moy kulutu ke misi me bependɔ ban. ¹³ Ke gba ngimɔ te yite ε meneti ngwanɔwama budyate. ε dya bakina ke mepel kamɔ, ε ndingele pel te wete si gbunɔgula. Bomɔ tomay yitan jɔ yiɓa sɔmbuma sɔŋ ke yi meneti ngwanɔwama nɔ ké. ε botu bete be tí gwe baka gwe wɔ budyate kwɔ lukse Njambiyɛ te ε diyɛ ke dyoɓɔ kɔ. ¹⁴ Yiɓa kemiye te yi kwanɔma ri. Ma yitatite ta be ke dya.

Jaki yitan jɔ yibate ke tɔ dɔmbiya

¹⁵ Ke kɔŋte, ε jaki yitan jɔ yibate tɔ dɔmbiya. ε yiɲa memen punde detinate ke dyoɓɔ lepɔ nde: «Deti te yi namna meneti maka me ke meɓɔ me Baba Mbokɔ wusu bene *Krist wene te yi nye tɔkuma kɔ. A ta namɔ kpo ne kpo.» ¹⁶ ε betomba baka kaba jɔ yini be diyɛ ke mesiya bekumande yan ke mbombu Njambiyɛ baka kuse meɓɔŋ kɔtɔ mbombu ke meneti kano

Njambiyε ¹⁷ lepɔ nde: «Njambiyε Baba Mboko, wε ε nε ηgunɔdɔfye hene, wε ndana kete, wε bɔ sendi kwey kete. Wuse ke nye wε wosoko, keto wε bonma nyanɔwe ηgunɔdɔfye yɔ yi bu nε diyɔ kumande yɔ. ¹⁸ Mekando me botu bete be yeti ke duwe wε baka wokuma kwana temo sunɔwe nε wε, ε ηgimɔ wokuna ηgambi yɔ dya. ηgimɔ te yi wε ta pesɔ nε josi botu bete be ma gwe baka dyanma. Yo ηgimɔ te yi wε ta nye botu be mesay bo, botu be punja melɛpi mɔ nduku mesay man. Wε ta nye sendi nye bomɔ bo hene, nye sendi botu bete be kambe wε, ko bonosike ko betomba. Ma pe yi botu bete be bekidye meneti maka baka, ηgimɔ te yi wε ta girise nε bo kε dyanma.»

¹⁹ Ke kɔnte, ε mbanjo Njambiyε te yi diyε ke dyobo kε futuna. Ε nyanɔwe kponɔi te yi tedye mbon Njambiyε bene kando dyene kε beɔna ke moy mbanjo nε. Ε yesi mbiyɔ yese budyate. Ε memen punde, ε lum mbiyɔ lumsa budyate, ε meneti ηwanɔwa, ε mɛtari nukudya balɔ.

12

Kasi wete nyari bene wete ndondo

¹ Ε wete nyanɔwe meyekambiyε punde ke dyobo. Yo bɔ wete nyari. A bɔ ke moy misi me yesɔ nε piyele. ηgwende bɔ ke pulɔ mekol mene pay nji. Besisɔ kamɔ jo yiba bɔ ke to nε nε dunɔwe te. ² A bɔ nε moy. A bɔ ke wa nε miy sanɔwa nε mebone kembɔ ke ηgimɔ te yi monosike bɔ ke nje kε.

³ Wete meyekambiye njā pundo sendi ke dyobo. Yo bā wete nyanḡwe nyamo nda ḡgando tenate ne hoko hoko nda dīte. A bā ne meto yitan jo yiba nē melako kamo. Ke meto menori yitan jo yiba to hene bā ne yiḡa yasi kete nda dḡḡwe bekumande. ⁴ Bo bakima besisḡ hene be diye ke dyobo baka ke menḡabiye yitati, ε kondu ne wukule ndiḡgele ḡgabiye besisḡ wete bete ke to meneti. E nye nje kwā kē teme ke mbombu nya te ε bā ke wa ne mḡ ko, na men monosike kome nye ta ja ké. ⁵ E nyari ja mono mbam. Mono te ta biye njambala te yi sumba yī namo ne mekando me bomo hene ke to meneti. Ke nyari ma si ja ké, ε Njambiye kele nde, monosike kēn pele yene ke siya bekumande ne. ⁶ E nyari nje bombō kwā kē ke konḡor ke mbey te yi Njambiye sima kombile tike nye ké, na kē dal nye mate yaka metu tomay wete jo ḡomay yiba jo kamotan jo kamo wete (1260).

⁷ E dyambi kpo ke dyobo. E Mikayel te nyanḡwe jaki Njambiye teme bene bejaki bene yī lḡ dyambi ne ḡgando ko. E ḡgando teme bene bejaki te bene janḡwe dyambi. ⁸ Ma ḡgando tī sume kol bene bejaki bene na. Dete, bo tī be se ne mbey diyo ke dyobo na. ⁹ E bo biye nyanḡwe ḡgando ko, njombu nyḡḡe ko bete kenje ke meneti. Bo jébanḡwe nye nde *Kum beya mekele, yiḡa nde *Satan. Nye Mo sebila bomo hene ke to meneti. Bo biyma nye bete kenje ke meneti bene bejaki bene.

¹⁰ E mi woke wete detina men ke lepō ke dyobo nde: «Ndana, ḡgimo te yi Njambiye jonḡwe ne

Ɔomɔ kɛ ɔyanma. A tedya ngungudye ne, tedye sendi nde, yo nye name. Ndana, *Krist te yi nye tokuma ko tedya sendi nde, yo nye be ne deti hene, keto bo biyima *Mo sɔmsa bemaŋ busu tu ne yeso ke mbombu Njambiyɛ wusu ko bete kenje ke meneti. ¹¹ Benjon busu laŋsama nye keto mekiyo me *Monɔ Sam nɛ keto melepi me Njambiyɛ te yi bo kwanɔya nye Ɔomɔ kɛ. Bo ti kambe son, kambidya ne jonɔwe ɔyan ne ngom ngom na. ¹² Dete, ɔyobo sɔsanɔwe nɛ wune be diyɛ kete baka. Mɛbɔne ne meneti nɛ maŋ, keto *Kum beya mekele piya kɛ pele yun ne beya nyaŋɔwe ngambi, keto a duwa nde, ngimɔ ne bukwa ndi ne mbet.»

¹³ Ke nyaŋɔwe ngando ko ma beɛe nde, bo betima nye kenje ke meneti kɛ, e nye kande ɔɔɔya nya te e jama monɔ mbam ko. ¹⁴ Yasi wete, e bo nye nyari mɛpapɔ me nyaŋɔwe mbele yiba, na je no kɛ no ke mbey ne pele koŋgor. Bo ta dalɔ nye mate yaka mɛsew yitati nɛ kumte londunate ne nyɔɛe ko. ¹⁵ E nyɔɛe ko jo moroku nda sombu nyaŋɔwe ɔfuku kenje ke koŋ nyari, nɛ yo memiyɛ nye. ¹⁶ Yasi wete, e meneti nje kama ne nyari. Meneti nyaliya bute numbu ne si menɔ ne nyaŋɔwe ɔfuku te yi nyaŋɔwe ngando ko joma kɛ. ¹⁷ Ke nyaŋɔwe ngando ma beɛe dete kɛ, e nye woke kwana temɔ sunɔwe ne nyari. E nye kwa yi kɛ lu ɔyambi ne bukwe mboya Ɔomɔ bete be wulma ke moy nya ko baka. Yo baka be bakidye membonɔga me Njambiyɛ, beŋɔwe sendi meyasi mete yi Yesu tedya kɛ. ¹⁸ E ngando ko kwa kɛ teme ke kundu mɛsey ke goŋ maŋ.

13

Kasi baŋa benyamɔ yiɓa

¹ Ke koŋte, ε mi beŋe wete nyamɔ ke pundo ke maŋ ne melako kamɔ nɛ meto yitan jo yiɓa. Lako hene ɓa ne yiŋa yasi nda ɗuŋgwe kete. Yiŋa ɗiɗo ɓa ketinate ke to hene. Meɗiɗo mete hene ɓa ke tedye yiŋa lepi gbutu suŋgwe ne Njambiye. ² Nyamɔ te yi mi beŋma ko ɓoŋnama ne ŋgwey. Mekol mene ɓa nda mekol me wete nyamɔ nda gbongoy. Numbu ne ɓa nda yi dila. E ŋgando ko nye nye ŋguŋgudye ne, nye sendi nye siya bekumande ne nɛ nyaŋgwe ɗeti te yi namɔ meyasi. ³ Mi beŋma yiŋa peŋ ke wete to nyamɔ ko nda a ta gwe gwako. Ko ɗete, peŋ te nja nje kwɛ. Botu be meneti maka hene tonduma nyamɔ ko kwa beŋgwe nye. ⁴ E ɓo kane ŋgando ko, keto a nya nyamɔ ko ɗeti te yi namɔ meyasi. Bo kanma nyamɔ ko lepo nde: «Nda yakama yeko to ne nyamɔ ko ko? Nda yakama lu ɗyambi ne nye ko?» ⁵ E ɓo nye nye ɗeti te yi lepo melepi me mbeno nɛ melepi me gbutu suŋgwe ne Njambiye. Bo nya nye ɗeti te yi kelo meyasi ɗete ke menwendɛ kamoni jo yiɓa. ⁶ E nye bute numbu ne yi lepo ne lepi gbutu suŋgwe ne Njambiye, suŋgwe ne ɗiɗo Njambiye nɛ mbey kome Njambiye ɗiye ke. E nye lepina sendi ɗete suŋgwe ne botu bete be ɗiye ke ɗyobo baka. ⁷ E ɓo nye nye ɗeti te yi lu ɗyambi ne botu be Njambiye laŋsa ɓo. Bo nya nye ɗeti te yi namɔ ɓomɔ ke njoka mboya ɓomɔ hene, ke njoka mekando hene, ke njoka menumbu hene nɛ ke njoka ɓomɔ hene ke to meneti. ⁸ Botu be

meneti maka hene ta kuse meboŋ ke mbombu nyamɔ kɔ kanɔ nye. Yo botu bete yi dɛno dyan tĩ be ketinate ke mekana me jɔŋgwe baka. Yo mekana me jɔŋgwe te yi *Mɔno Sam te yi bo woma kɔ. Medino man tĩ be ketinate ke moyte na kande ke kusuna mbokɔ.

⁹ Mɔ te e ne metɔ te yi wokɔ ne pe, a wɔku. ¹⁰ E nde: Ke yi mɔ te yi yo sima kpona ke yene nde, bo ta biye nye ne bala, a ta be bala gbate. Ke yi yɔkɔ yi yo sima kpona nde, bo ta wo nye ne kafa, bo ta wo nye gbate ne kafa. Nda yo dete ké, botu be Njambiyɛ kɛl tinj tiko temɔ ke yi Njambiyɛ kɛ no mbombu.

¹¹ Ke kɔnte yinori, e mi beŋe sendi wete nyamɔ ke pundɔ ke moy meneti. A bɔ ne melako yiba nda yi mɔno sam. A bɔ ke lepina nda ngando. ¹² A bɔ ke kelɔ nyaŋgwe mekele ke mbombu nyamɔ te yɔru ne kiya deti nda nye. A kelma nde, ndiŋgele meneti nɛ botu be meneti hene kân nyamɔ te yɔru. Yo nyamɔ te e ma béki mbombu ne peŋ te yi bɔ nde, a ta gwe gwakɔ, e yo si nje kwɛ kɔ. ¹³ A dikima kelɔ nyaŋgwe meyekambiyɛ, kelɔ gba nde, dite wûla kwey piye ke meneti ke misi me bomɔ. ¹⁴ A jatidya botu be meneti maka ke beya nje. A kelma dete ne nje meyekambiyɛ mete yi bo nya nye deti te yi kelɔ ke mbombu nyamɔ te yɔru ké. A dikima lepɔ nye bomɔ nde, bo kɛl yekambiyɛ nyamɔ te yɔru kanɔ yo. Yo nyamɔ te yi bo ma kótu nye ne kafa, e nye nje ju ne kɔkɔ kɔ. ¹⁵ Bo nya nye deti te yi kelɔ nde, yekambiyɛ nyamɔ kɔ sɔsu kelɔ nde, a tâpitangwe yí lepɔ nde, bo wɔku bomɔ hene be ta diyɔ kine

kano yekambiyε nyamɔ te baka. ¹⁶ A kelma sendi nde, bomo hεnε, ko bombesike ko betomba ko botu be kusuku ko buka bomo ko baka be yeti bebala ko bebala, mumɔ hεnε bεki nε yɔ nyamɔ te ke mbam bo ho ke mbombu nε. ¹⁷ Yo nde, ηge mumɔ ti be nε yɔ nyamɔ te ke yotu na, ko mɔ te tɪ bomo ho dyanɔgwe yaɲa na. Yo te tɛfya dɪno nyamɔ te, tedye sendi yiɲa buyɔ yasi te yi tedye dɪno nyamɔ te kε.

¹⁸ Yo waka yi mumɔ ta tedye dyanɔ dyenε yey. Mɔ te ε nε dyanɔ ko kwɛdyanɔgwe buyɔ yasi te yi tedye nyamɔ te kε. Yo nde, buyɔ yasi te bεɲa mumɔ. Buyɔ te, yo gomay yitan jo wete jo kamotan jo kamo wete jo yitan jo wete (666).

14

Botu be Njambiyε ke jembɔ wete

jɔɲja jembɪ ke dyobo

¹ Ke kɔɲte, ke mi ma kaɲε misi, bεɲa, *Mɔno Sam ke tɛri ke keki *Siyɔɲ bene bomo tomay gomay wete jo tomay kamoni jo yini (144.000). Yo bɔ botu bete yi dɪno dyenε nε dɪno sanɔgwe wene bɔ ketinate ke membombu man baka. ² ε mi woke wete men ke wule dyobo nda mesoko me nyanɔgwe duku. Yo bɔ nε ηgi ηgi ηgi nda mɛduɲ me nyanɔgwe lum mbiyɔ. Men te yi mi wokuma kε boɲnama nε mɛmɛn me botu bete be mende mɛkundε ke ηgimɔ te yi bo jembina mende nε mɛkundε man kε. ³ Botu tomay gomay wete jo tomay kamoni jo yini (144.000) baka dikima jembɔ wete jɔɲja jembɪ ke mbombu siya bekumande nε ke mbombu be jɔɲjɔɲgwe meyasi

yini nè ke mbombu betomba bari. Mumɔ wete ne wete ti be ne deti te yi jekɛ jembɛ yinɔri na, soŋɛ ndi botu baka tomay gomay wete jo tomay kamɔni jo yini be Njamɛye sima si kolɔ ke meyasi me meneti baka. ⁴ Yo botu bete be ti diye bene bomari kɛ nɔ yi nye ne memi ke yotu yan baka. Yo nde, bo hene bakidya meyotu man nda bindi beŋɔndu. Mbey hene te yi Monɔ Sam kɛ kete, bo ke beŋgwe nye. Njamɛye kolma bo ke njoka botu be meneti maka, nɛ bo be nda nyambi tɔmna te yi bo kaŋɛ nye Njamɛye bene Monɔ Sam. ⁵ Ko yinɔ lɛpi jɔ ti punde wete yesɔ ke numbu yan na. Sendi, kinɛ yaŋa te yi bo yakama ndeye bo kete na.

Bejaki be Njamɛye yitati ke lɛpɔ

kasi jɔsi te yi ta nje kɛ

⁶ Ke kɔŋte, ɛ mi nje beŋɛ wete jaki Njamɛye sendi ke je ke kwey ne mbiyɔŋ. A bɔ ne Kimɔ Tom te yi ta diyɔ kpo ne kpo, na lɛpi nye botu be meneti maka, lɛpɔ nye mekandɔ hene, nye mboya bomɔ hene, lɛpɔ nye bomɔ hene, ko bo lɛpi numbu te yen, lɛpɔ sendi nye kwalɔ bomɔ hene. ⁷ A dikima lɛpɔ ne men ke kwey nde: «Wune kambi Njamɛye lukse nye, keto ŋgimɔ te yi nye ta pesɔ ne jɔsi kɛ sima dya. Wune kɔn yɔkɔ ɛ kusuma dyaɔbɔ nè meneti nè maŋ nè mendɔŋ medfuku kɔ.»

⁸ Ke kɔŋ jaki te ete, ɛ jaki yibate dya lɛpɔ nde: «Yene siyma! Yene siyma, Babilon te nyanɔwe dya! A kelma nde, bomɔ hene ke to

meneti hōbiya menjam mene. Menjam mete, yo nyakbala mekele me memi mene.»

⁹ Ke kōj bejaki benōri yiḃa, ε jaki yitatite dyaḃ lēpō ne men ke kwey nde: «Ŋge mumō kanē nyamō kō, kanō yekambiye ne, ḡge mumō be ne yō ne ke mbōmbu ho ke ḃō ne, ¹⁰ mō te ta hōbiye sendi menjam mete yi tedye ḡgambi Njambiye ké. Njambiye ta kumbē yo ne senḡelēḡ ke pelō te yi tedye ḡgambi ne ké. Mō te ta dīyō ke moy meḃōne ke lam dīte nē ke moy piti. A ta saḡgwa ne meḃōne dēte ke mbōmbu pupuna bejaki be Njambiye nē ke mbōmbu *Mōnō Sam. ¹¹ Ma ḃotu βete be ta kanō nyamō kō, kanō sendi yekambiye ne ḃaka tī be ne mōnō ḡgimō mewedyā na, ko tu ko yesō. Sendi, mumō hēne te ε ta be ne yō te yi tedye dīnō nyamō kō ke yotu ne, mō te ta saḡgwa sendi ne meḃōne dēte. Yidyē dīte te yi tedye ḃō meḃōne ké ta tulō kpo ne kpo.» ¹² Dete, ḃotu be Njambiye, yite nde, ḃaka be ḃakidyē memḃōḡga me Njambiye, tikō sendi temō ke yi Yesus ḃaka kēl tiḡ kē nō mbōmbu.

¹³ ε mi wokē men ke wulē dyoḃō lēpō nde: «Keto meḃēpi maka yi lēpe nde: ḃotu βete be nje gwe yite, ḃō me saḡgwate bene be Nyangwe Kumande ḃaka ne mesosa kande ndana. ḃō ke wedyā ke mesay mete yi ḃō kelma ké, keto kimō mekele man ke kōj yan. Kimō Sisij ke jaye nde, yo ḡbate dēte.»

Ngimō ḃakina kimō nyambi

nē ḃeya nyambi

¹⁴ Ke mi ma kaḡe misi, beḡa, yiḡa wumna kulutu. Yiḡa yaḡa ḃa metidyē ke to kulutu

yinori nda gba mumo. A ba ne dɔngwe ke to. Yo ba tande lor. A ba sendi ne wete nyanɔgwe wotuna ken ke bo. ¹⁵ E wete jaki Njambiyɛ punde ke mbanjo Njambiyɛ kembidya dɛtinate lɛpo kenje mo te e ba metidye ke to kulutu ko nde: «Sambila bo ne ken yo yi peso ne nyambi, keto ngimo soɔna nyambi ke ngwan sima dya. Nyambi te yi diyɛ ke to meneti ke sima dɛto.» ¹⁶ E mo te e ba metidye ke to kulutu ko sambile ken kenje meneti. E nye si soɔne nyambi hene.

¹⁷ E wete jaki punde sendi ke mbanjo Njambiyɛ te yi diyɛ ke dyobo ke. A ba sendi ne nyanɔgwe wotuna ken.

¹⁸ Ke kɔnte, e mbanja jaki Njambiyɛ nje pundo wule ke mbey nyena sadaka nye Njambiyɛ. A ba ne dɛti te yi kelo yasi hene te yi nye kwadye ke ne dɛte. E nye lɛpe ne men ke kwey kenje jaki te e ba ne nyanɔgwe wotuna ken ko nde: «Sambila wotuna ken yo yi noko ne mesan me *vinye mete yi ke to meneti ke, keto membumo mete sima dɛto.» ¹⁹ E jaki te sambile ken kenje meneti. E nye noko membumo me *vinye ke kumbe ke nyanɔgwe mbey soɔpita membumo te yi tedye ngambi Njambiyɛ ke. ²⁰ Bo duwa ke dya ke soɔpita yo ne nan. Ke ngimo soɔpitate, e mekiyo punde. Yo punduma dendila kumo kilometa gomay yitati. Dimo te kumma saman te yi yanɔa yakama tota kumo ke ngin.

15

Bejaki yitan jo yiba ke lɛpo mekemiye

mete yi ta dyɔ ké

¹ Kε kɔŋte, ε mi beŋe wete nyangwe meyekambiyε sendi ke dyobo. Yo bɔ yasi te yi nɔgbakima budyate. Yo bɔ bejaki be Njambiyε yitan jɔ yiɓa. Bo bɔ ne njena mekemiye yitan jɔ yiɓa. Yo nde, Njambiyε ta kwɔ ne mekemiye menɔri yí sidye ne tedya nɔgambi ne.

² Ε mi beŋe yiŋa yasi nda maŋ. Yo bɔ ke panɔ ne nɔɔy nɔɔy. Dite bɔ sendi kete. Ε mi beŋe sendi bomɔ ke teri ke to maŋ yinɔri. Bo bɔ ne mekunde me Njambiyε ke meɓɔ. Yo bɔ botu bete be laŋsama nyamɔ kɔ baka. Bo tɔ kanε yekambiyε ne ho be ne yiŋa buyɔ yasi ketinate ke yotu yan yi tedye dɔnɔ nyamɔ kɔ na. ³ Bo ke jembɔ jembɔ te yi Mɔyisi te mɔ mesay me Njambiyε dikima jembɔ ké, jembɔ sendi jembɔ *Mɔnɔ Sam. Bo ke jembɔ leɔɔ nde: «Njambiyε te Baba Mbokɔ ε ne nɔnɔgudye hene, mekele mɔ gba nyangwete, yo yasi te yi nɔgbakima budyate: We Kumande bomɔ hene ke to meneti, we kél yasi ne nɔnɔ, mekele mɔ hene tedya ndi gbakasi. ⁴ Baba Mbokɔ, nda ta dɔyɔ kinε kambɔ we kɔ? Nda ta dɔyɔ kinε lukse dɔnɔ dɔyɔ kɔ? Keto yo ndi we nyεɔ be kinε sembɔ na. Mekandɔ hene ke to meneti maka ta nɔnɔ nje kanɔ we, keto we tedya nye bomɔ hene nde, mekele mɔ ne nɔnɔ.»

⁵ Kε kɔŋte, ke mi ma kanε misi, beŋa, mbanjɔ Njambiyε te yi dɔyε ke dyobo ké butunama. Ε mi beŋe mɔnɔ tɔ te yi bo kele ne to melambɔ yi tedye nde, Njambiyε ke njoka bomɔ bene ké ke mɔyε. ⁶ Ε bejaki be Njambiyε yitan jɔ yiɓa be

ɓa ne mekemiye yitan jo yiba baka punde ke moy mbanjo Njambiye ke se. Bo ɓa ne yiɓa wumna melambo ne fanya fanya ke yotu ne mekanda ke beti tande lor. ⁷ Ke njoka be jonjongwe meyasi mari yini, e wete kanɛ mepelo yitan jo yiba nye bejaki be Njambiye baka yitan jo yiba. Mepelo mete ɓa tande lor. Yo ɓa tondunate ne ngambi Njambiye te e diye kpo ne kpo ko. ⁸ E meluksa ne ngungudye te yi Njambiye be no ke kele nde, yidye tondu ke mbanjo Njambiye ne kip. Ko mumo wete ne wete ti be ne deti te yi nyiɓe ke moy mbanjo na kumo nde, mekemiye yitan jo yiba te yi bejaki be Njambiye baka yitan jo yiba be no ke siki kelna.

16

Kasi mepelo mete yi ne ngambi

Njambiye kete ke

¹ E mi woke yiɓa detina men ke wule ke mbanjo Njambiye te yi diye ke dyobo ke. E men te lɛɛ nye bejaki baka yitan jo yiba nde: «Ne kwân, ne kumba yasi te yi ke moy mepelo maka yitan jo yiba yi tedye ngambi Njambiye ke kenje meneti.»

² E bosa jaki kwa, e nye kumbe pelo te wene kenje meneti. E yiɓa beya kwana mepen nukudya fiye botu bete be ɓa ne yo nyamo ko ke yotu yan, kanɔ sendi yekambiye ne ko.

³ E jaki yibate kumbe pelo te wene kenje ke maɓ. E moroku me maɓ liɓgwe mekiyo nda mekiyo me muɓ mumo. E yasi hene te yi ɓa ne jon ke moy maɓ ke si gwe.

⁴ Ε *jaki* yitatite kumbe pelo te wene ke medfuku ne ke mengɛ. Ε yo hene si lingwe mekiyo. ⁵ Ε mi woke *jaki* te ε *dīye* ne medfuku hene ko ke lɛpɔ nde: «We ne ngben, yori yi we pesima nde, meyasi kwânnangwe deke ké. Siya Njambiyε ndi gba we, we nyepɔ. We yoko ε ndana kete, yoko ε bɔ kwey kete ko. ⁶ Bo punja mekiyo me botu bo ne mekiyo me botu be punja melɛpi mo. Ma ndana, we nya bo mekiyo nde, bo hɔbiya. Yakama nde, bo sângwangwe no dete.» ⁷ Ke kɔnte, ε mi woke wete men ke wule ke mbey nyena sadaka nye Njambiyε. Men te lɛpima nde: «J, Njambiyε te Baba Mboko ε ne ngungudye hene, we pési meyasi mo ne ngben, lɛpɔ gbakasi!»

⁸ Ε *jaki* yinite kumbe pelo te wene ke misi me yeso, ε yeso be ne deti te yi lodye bomo nda dite. ⁹ Ε wete banban jon lodye bomo. Ke bo ma benɛ dete ké, ε bo lɛpe lɛpi gbutu sungwe ne dīno Njambiyε te yoko ε *dīye* ne mekemiye mete ko. Ko bo ti yensa temo yi lukse nye na.

¹⁰ Ε *jaki* yitante kumbe pelo te wene ke siya bekumande be nyamo ko. Ε yitil ngangile ndingele mbey te yi nyamo ko name ké. Ε bomo kande nyambina medyem man keto mebone mete yi bo sangwama no ké. ¹¹ Ε bo lɛpe lɛpi gbutu sungwe ne Njambiyε te ε *dīye* ke dyobo ko keto mebone mete yi bo sangwama no ne beya kwana mɛpen mete yi biyima bo ké. Ko bo ti yensa temo ke mekele man na.

¹² Ε *jaki* yitan jo wete kumbe pelo te wene ke nyangwe dfuku te yi bo jeba nde Efrat ko. Ε

sombu duku si gweye ne ngbay, né bekumande bete be ta wule pulo kome yeso punde baka dól nje kwanje. ¹³ Ke konje, ε mi beje beya mesisin yitati. Bo boɲnama ne bejebo. Wete punduma ke numbu ngando ko, wete ke numbu nyamo ko, wete ke numbu mo punja melepi me ja. ¹⁴ Meyasi menori, yo beya mesisin me *Satan yi kele meyekambiyε ké. Mesisin mete kén ke yi bekumande be meneti maka hene yi wesidyε bo yí dyambi te yi ta kelna ke nyanɲwe *Yeso Njambiyε te ε ne ngunɲudye hene ko. ¹⁵ E men te yi mi wokuma ké lere nde: «Beɲa, mi yima nda mo gubo! Mo te ε diyε mejemsidyε bakidyε melambo mene pupunate ko ne mesosa, keto a tí kendo sokere, be ne njon ke misi me bomo na.» ¹⁶ Mesisin maka wesidya bekumande be meneti maka ke wete mbey te yi bo jeba ke numbu Hebere nde Harmagedon.

¹⁷ E jaki yitan jo yibate kumbe pelo te wene ke gbela pupolo te yike. E yina men lepina detinate wule ke siya bekumande te yi diyε ke mbanjo Njambiyε ké. Men te lepima nde: «Yina yanja te yí kelo yeti se na.» ¹⁸ E yesi mbiyo yeε budyate. E memen punde. E lum mbiyo lumsa budyate, ε meneti ngwanɲwa budyate. Kande ne yi Njambiyε ma kusu ne mumo tiko ke to meneti, meneti ti pa ngwanɲwa dete wete yeso na. ¹⁹ E Babilon te nyanɲwe dya nyaliye ke menɲabiye yitati. E nyanɲwe medya hene te yi diyε ke to meneti ké si gbunɲula. Njambiyε takima nyanɲwe dya ke dete yí nye nye pelo menjam mete yi tedye nyanɲwe ngambi ne ké.

²⁰ Ε μεκiringira hene si yambile, ko mekeki ti beyna se na. ²¹ Ε wete nyaᅅgwe mbiyo metari wule dyobo nukudya ke to bomo. Dito kil metari wete kumma kilo kamoni. Ko dete, bomo lepima lepi gbutu sunᅅgwe ne Njambiyε, keto kemiye metari menori, keto yo ba beyate budyate.

17

Njambiyε ke peso josi Babilon

te nya mewanja ko

¹ Ke konᅅte, ε wete jaki ke njoka bejaki baka yitan jo yiba be ba ne mepelo yitan jo yiba baka nje lepo nye mi nde: «Inja, ne mi tedye we nda yi nyaᅅgwe nya mewanja ko ε diye ke to budya meduku ko ta sanᅅgwa ne pesina josi ke. ² Bekumande be meneti maka ngboma kelo mekele me memi bene be nya ko. Ε botu be meneti maka tukuse gwe menjam mene. Menjam mete, yo mekele me memi mete yi nye kelma bene bo ke.»

³ Ε jaki ko bu mi ne nje te yi sisin kumo no ke wete kongor. Ε mi bene wete nyari metidye ke to wete tena nyamo ne hanᅅbe hanᅅbe. Medino mete yi tedye lepi gbutu sunᅅgwe ne Njambiyε ke ba ketinate ke yotu nyamo enoru ne ngben. A ba ne meto yitan jo yiba ne melako kamo. ⁴ Nya te lehma yina kpaasa kimo tena lamba ne hanᅅbe hanᅅbe. Ke melenᅅgwe mene, yina ba ne lor, yina ne kpaasa yina metari, yina ne kpaasa yina meyasi nda membambo. A ba ne wete pelo ke bo, bo sama yo ne lor. Mekele me nyε ne mekele me memi mete yi kelna mewanja mene ba ne

ngbeɲ ke moɣ te. ⁵ Yiɲa diɲo te yi tedye yasi te yi be soɖyate ké bɔ ketinate ke mbombu wene. Yo bɔ ketinate nde: «Babilon te nyaɲgwe dya, nye Nyangwe ne botu be kelna mewanja nè botu be kelna mekele me memi ke to meneti maka.» ⁶ Teri nya ko yi mi beɲma ké bɔ nda yi mo te e si gwe menjam. Yo mekiyo me botu be Njambiye nè mekiyo me botu bete be lepe kasi Yesu yi nye hoɓiya ké kele nde, a bêki dete. Ke mi ma beɲe nye ké, e mi ngbakima buɖyate.

⁷ E jaki diye mi nde: «We ngbakimaɲgwe keto nge? Mi ta punje yasi te yi be soɖyate ke kasi nya ko nè ke kasi nyamo te e soɓe nye ko ndana nye we. Yo nyamo te e ne meto yitan jo yiɓa nè melako kamɔ ko. ⁸ Nyamo te yi we beɲma ko bɔ ne jon ne mbombu, ma ndana a yeti se ne jon na. A ta be ke pundo ke heɓeɓe gboɲgo ndon gwe ɓone ne ngbot. Botu be meneti maka yi diɲo dyan ti be ketinate ke mekana me jonɲgwe wule ke ngimo te yi Njambiye kusuma ne mboko ké ta ngbakima yi beɲe nyamo ko. Bo ta ngbakima, keto nyamo ko bɔ ne jon ne mbombu, ma ndana a yeti se ne jon na. Sendi, a ta nje punje yotu ne koko.

⁹ «Ma yo waka yi mumo yaɲkaɲgwe tedye nde, a ne dyaɲo gbate yey. Yo nde, meto maka yitan jo yiɓa tedya mekeki yitan jo yiɓa te yi nya ko diye metidye kete ké. ¹⁰ Meto maka tedya sendi bekumande yitan jo yiɓa. Ma ke njoka yan, yitan yeti se na, wete ndi kete, ma mbanja ti pa dya na. Ndi nde, kome mbete ta dya ké, ngimo namnate yene ta be kumte. ¹¹ Nyamo ko e bɔ ne jon ne

mbombu, ma ndana a yeti se kɔ, nye kumande yitan jɔ yitatite. A ke njoka te bari yitan jɔ yifa. Ma a ta gwe bɔne ne nɔgbɔt. ¹² Melako kamɔ te yi we bɛnma kɛ tɛdya bɛkumande kamɔ be ti pa bu diyɔ bɛkumande baka. Yasi wete, bo ta bu diyɔ bɛkumande yɪ namɔ saman monɔ ngimɔ ne mbet bene be nyamɔ kɔ. ¹³ Bɛkumande baka hene ndi ne kiya to yasi wete yi tonje, yo nde, bo nyɛki nɔnɔnɔdye yan nye nyamɔ kɔ, sana ne deti yan hene nye nye. ¹⁴ Bo ta lu dyambi ne *Monɔ Sam. Yasi wete, Monɔ Sam ta laɔsa bo, keto nye Baba Mboko te e laɔsama bebaba mboko. Nye Kumande bɛkumande. Nɛ nye nɛ botu bete be nye sima tɔke, botu bete be nye jebama, bo botu bete be wokuna ne nye baka, bene bo hene ta laɔsa.»

¹⁵ E jaki lepe sendi nye mi nde: «Meduku mete yi we bɛnma yi nya mewanja kɔ diye metidye kete kɛ, yo tɛdya mekandɔ me bomɔ nɛ menɔgil me bomɔ. Yo tɛdya botu be meneti maka hene nɛ bomɔ be lepe ko kwalɔ numbu te yen. ¹⁶ Melako maka kamɔ yi we bɛnma kɛ nɛ nyamɔ kɔ ta benɔ nya mewanja kɔ nye bo ke dite. Bo ta wɔmbile meyasi hene ke mebo mene tiko nye sokere. Bo ta dye mbundɔ yotu ne lodye yike yi ta bukwe kɛ. ¹⁷ Yo Njambiyɛ kele nde, bɛkumande baka hene bɛki ndi ne kiya to yasi wete yɪ tonje. A kelma dete, nɛ bo tonje yasi te yi nye sima si kpo kɛ. Yo nde, bɛkumande baka kɛl mesay yɪ nye ne diyɔ namnate yan nye nyamɔ kɔ kumɔ nde, melepi mete yi Njambiyɛ lepima kɛ siki tondo.

¹⁸ «Ma, nya te yi we bɛnma kɔ tɛdya nyanɔgwe

dya kɔ ε dɔye ne bekumande ke to meneti kɔ.»

18

Njambiyε ke yangile Babilon

te nyangwe dya

¹ Ke kɔnte yinɔri, ε mi beɛɛ sendi wete jaki Njambiyε ke piye wule dɔyɔɔ. A bɔ ne deti budɔyate. Ε meluksa mete yi nye bɔ nɔ kε paniyε ndiɛgele meneti. ² Ε nye kembidya detinate lɛɔ nde: «Yene siyma, yene siyma, Babilon te nyangwe dya! A lingwa gbanɛ beya mesisiɛ me *Satan, gbanɛ kwalɔ beya mesisiɛ hene, gbanɛ hikiri hikiri beya benɔn hene. ³ Yo dyanɛma dete ke yi Babilon, keto mekandɔ me botu be meneti hene hɔbiya menjam mene. Yo nyakbala mekele me memi mete yi bo nε bekumande be meneti maka kelma bene be Babilon kε. Yo sendi nde, botu be dyanɛwe meyasi ke to mbokɔ baka tonduma ne kusuku keto mberi meyasi mene.»

⁴ Ke kɔnte, ε mi woke wete men ke lɛɔ wule dɔyɔɔ nde: «Wune botu bembε, ne jisa pundɔ ke dya ke, ma wune me nje nyiɛ ke moy mebeyɔ mene. Wune jisa, kambɔ ne nje sangwa ne mekemiye mete yi ta balɔ ke to ne kε. ⁵ Wune jisa, keto mebeyɔ mene ma wesidya ne kembembe kumɔ dɔyɔɔ. Sendi, Njambiyε ti lensa kɔtu mekele mene na. ⁶ Wune yɔkidya ndi kiya yasi te yi nye kelma ne besɔ kε nye nye. Ke yasi hene te yi nye kelma, wune yɔkidya yo menɛga yiɔa beɛɛwe mekele mene. Nge be nde, a yekima ndonje pelɔ hakambe menjam wete, wune kpɔl yeko yiɔa nye nye. ⁷ Ndi nda yi

nye dɔngwa ne beti kwey, jɔɔna ke nyem nyem jɔngwe, wune kp̄al tedye nye meɔɔne ndana tikɔ nye ne misidyɛ ke misi ndi dɛte sendi. Wune k̄el ne nye dɛte, keto a ke lɛpɔ ke mɔy temɔ ne nde: <Mi ke namɔ meyasi nda kumande. Mi yeti kusɔ na. Ko mi t̄i be ne misidyɛ ke misi wete yesɔ na.> ⁸ Keto metake mete yite mekemiyɛ maka ta balɔ ke to ne ke kiya yesɔ. A ta saɔgwa ne sɔɔ, misidyɛ ta pundɔ ke misi mene. Kolo ta dya nye, d̄ite ta lodye nye ne ɔgito. Yo ta kwanɔna dɛte, keto Baba Mbokɔ, Njambiye te e pesima jɔsi ne kɔ ne ɔgungudye.» ⁹ Bekumande be meneti maka hene be nya bo ke kelna mekele me memi bene be nya kɔ, jɔɔna bene bo ke nyem nyem jɔngwe baka ta lelo jaba keto ne. Bo ta kelɔ dɛte kome bo ta beɔe tululu yidyɛ d̄ite te yi ta girise nye k̄e. ¹⁰ Bo ta gwe wɔ nyangwe meɔɔne mete yi nye ta saɔgwa nɔ k̄e, d̄iyɔ ne nan ne m̄j̄i ne nye lɛpɔ nde: «O meɔɔne wa! O meɔɔne ne nyangwe dya nde Babilɔn te ɔgabolo dya wa! Pesina jɔsi Njambiye balma ke to yɔ ndi ke hawa wete!»

¹¹ Ma botu bete be dyaɔgwe meyasi ke to mbokɔ baka ke lelo punje misidyɛ ke misi keto Babilɔn, keto mɔ te e boɔme mejeɔ man yeti se na. ¹² Meyasi mete yi bo d̄ikima dyaɔgwe k̄e b̄a lor ne yiɔa sumba sendi ne kpasa yiɔa metari ne kpasa yiɔa yasi nda membambo. Yo b̄a ne yiɔa kpasa wumna to melambo ne yiɔa kpasa tena melambo ne yiɔa jendina melambo ne yiɔa tena melambo ne hangbe hangbe. Yo b̄a sendi ne kpasa kwalɔ mejeti hene ne kwalɔ meyasi hene te yi bo sa ne s̄y njoku ne kwalɔ meyasi

hene te yi bo sa ne kpara mejeti mete yi dye budya moni ne meyasi mete yi bo tuye ne yija yasi nda tunji ne sumba ne wete wumna tari. ¹³ Bo dikima dyanḡwe sendi kwalo wete kpara lobinda nde sinamom ne yija membunjo te yi ne kimɔ metul nde amom. Bo dikima dyanḡwe sendi yija budya kwalo melobinda ne yija yi bo kele ne wete monjo jeta mbunjo nde *mir ne yija sendi nda paka. Bo dikima dyanḡwe sendi menjam ne gbela memuto ne su farin ne yija nyambi nda mbusa. Bo dikima dyanḡwe benday ne besam ne beyanga ne yija mematuwa mete yi tande sumba yi beyanga dikima dale ke. Bo dikima dyanḡwe sendi bebala ne gbela bomo. ¹⁴ Botu be dyanḡwa meyasi maka dikima lepɔ nye nyanḡwe dya ko nde: «Meyasi mete yi we nya temo yo hene kete ke sima londɔ ne we. Kimɔ ngerɛ ngerɛ buyo kusuku hene te yi we ba no ke sima si yambile ke mebo mo. Ko we ti bedya se yo wete yeso na!» ¹⁵ Botu be dyanḡwa meyasi benori be sombuma kusuku keto ne baka ta gwe wo nyanḡwe mebɔne mete yi nye ta sangwa no ke, diyɔ ne nan ne mbi ne nye. Bo ta lelo punje misidyɛ ke misi. ¹⁶ Bo ta lepɔ nde: «O mebɔne wa! O mebɔne ne nyanḡwe dya ke e dikima lenɛ kimɔ fanya fanya wumna lambɔ ko wa! O nye e dikima lenɛ kpara hanḡbe hanḡbe tena lambɔ, kombile melenḡwe mene ne lor ne kpara metari ne kpara yija yasi nda membambo ko wa! ¹⁷ Ma ndi ke hawa wete ne wete budya kusuku te yinori sima si yangila!»

Botu be dukuna kuka hene ne nyanḡwe

bemasa ban nè bomɔ hene te be kele mesay ke man nè gbela botu bete be kè yan kendi baka, bo hene dikima teme ne nan ne mbi. ¹⁸ Bo dikima kanɛ misi yí beɛne ne tululu yidyɛ dite te yi girise dya ke ké. E bo dikima kembidya lepɔ nde: «Dya te nda e nda nyaɛngwe dya ko ko?» ¹⁹ Bo dikima taye ngbutu kutudye ke meto man lelo jaba kembidya lepɔ nde: «O meɔone wa! O meɔone ne nyaɛngwe dya ke yi bomɔ hene te be ne mekuka ke man sɔmbuma kusuku keto ne ké wa! Ma ndi ke hawa wete ne wete, bo sima yangile nye!»

²⁰ Dyobo, sosangwe ke yasi te yi dyanma nye ké. Ma wune botu be Njambiyɛ nè wune botu be tomun be Yesus nje bu wune botu be punja meɛpi me Njambiyɛ, wune sɔsangwe sendi, keto Njambiyɛ pesima josi dya ke yí kundɔ ne wune.

²¹ Ndana, e wete detina jaki Njambiyɛ bu yiɲa tari nda nyaɛngwe tari mekoko bete ke man lepɔ nde: «Yo deke nda yi bo ta yombile ne Babilon te nyaɛngwe dya bete ne ven. Ko bo tí beɛne se mbombu wene na. ²² Ko mumɔ tí woko se bomɔ ke mende mekunde ho woko men bomɔ ke jembina ke dya dyo na. Ko mumɔ tí woko se bomɔ ke to meɛmbule nè meɔombiya na. Ko sana kwalɔ yasi te nda, ko wokuna meɔun me kokuna yiɲa yasi tí beɛna se ke dya dyo na. ²³ Ko puye lambo wete ne wete tí panɔ se ke yasi yo na. Ko mumɔ tí woko se men mbam bene nyari ke kelo jesɔ gwaki ke yasi yo na. Meyasi ta kwaɲna dete, keto botu bete be dikima dyaɛngwe meyasi ke dya dyo baka ba nyaɛngwe bomɔ ke to meneti maka hene. Sendi, we jatidya mekandɔ me botu

be meneti hene ke beya nje keto kelna mekele me kifi yo. ²⁴ Yo nde, Njambiyε semma mekiyo me botu be punja melepi mene nε mekiyo me botu bene nε mekiyo me bomo hene te yi bo woma ke to meneti maka baka ke mebo mene.»

19

¹ Ke koη meyasi menori, ε mi woke yiηa detina men ke wule dyobo nda men nyanḡwe ηgil bomo. E men lepe nde: «*Aleluya, yo Njambiyε wusu nye wuse joηḡwe! He lúksa nye. He dúkwe nde, a ne ηḡḡḡdyε. ² A pési meyasi ne ηḡben lepo gbakasi, keto a pesima josi nyanḡwe nya mewanja ko ε bekidya meneti ne kelna mewanja mene ko. Njambiyε kunduma mekiyo me botu be mesay bene ndi ke yotu nya mewanja ko ne ηguru wene.» ³ E bo basidyε lepo nde: «Aleluya! Yidyε dite te yi lodye nye ké ta tulō bendō kpo ne kpo.» ⁴ E betomba baka kaba jo yini nε be joηjoηḡwe meyasi maka yini kuse meboη kanō Njambiyε te ε ke metidyε ke siya bekumande ko. E bo lepe nde: «*Amen, aleluya!»

Kasi ηgimo jesō gwaki

te yi Mōno Sam

⁵ E wete men wule ke siya bekumande lepo nde: «Wune sōmbila Njambiyε wusu, wune botu be mesay bene hene, wune be kambε nye baka, ko bonosike ko betomba.» ⁶ Ke koηte, ε mi woke wete men nda men nyanḡwe ηgil bomo. Yo boηnama ne mesoko me nyanḡwe duku. Yo boηnama sendi ne meduη me nyanḡwe lum mbiyo. Men te lepima nde: «*Aleluya! Keto

Baba Mboko te Njambiyε wusu boŋma diyo kumande ne. A ne nguŋgudye hene. ⁷ Wuse sōsaŋwe. He sōsaŋwe kpesa. He lúksa nye, keto ngimo jeso gwaki *Mōno Sam dyaŋma. Nya gwaki wene sima si komsa. ⁸ Ngimo yakama yi nya gwaki yakama leŋe kimo fanya fanya wumna lambō.» Wumna lambō te tédya ngben mekele mete yi botu be Njambiyε kelma ké. ⁹ E jaki lepe nye mi nde: «Keto nde: Botu bete yi bo jebama ke jeso gwaki Mōno Sam baka ne mesosa.» E nye lepe sendi nye mi nde: «Melepi maka, yo gbakasi, yo ngbak ngbak melepi me Njambiyε.» ¹⁰ E mi bale ke nji mekol mene, né mi kan nye. Yasi wete, e nye lepe nye mi nde: «Ay, we ti bobo! Sine we ne benjon bo be bakidye meyasi mete yi Yesus tedya ké, wuse hene ndi kiya kumbo botu be mesay. Dete, kanō ndi Njambiyε.» Keto lepi hene te yi Yesus lepima ké, yo yite nye botu be punja melepi me Njambiyε deti te yi punje melepi mene.

Kasi Mō te e ke to wumna yaŋga ko

¹¹ Ke kōnte, ke mi ma kaŋe misi, beŋa, dyobo nyase, e mi beŋe wete wumna yaŋga. Dino mō te e bā ke to yaŋga te kō bā nde Mō te e tonje meyasi mete yi nye si kpo. Yiŋa dino dyene nde Mō te e lepe ndi gbakasi. A pési josi lū sendi dyambi ne ngben. ¹² Misi mene bā ne hōkō hōkō nda lam dite. A bā ne budya meḍuŋwe ke to. Wete dino bā ketinate ke yotu ne. Ma ko mumō wete ne wete ti duwe dino te na, soŋe ndi nye sa te. ¹³ Lambō te yi nye leŋma ké bā tande mekiyo ne batikala. Dino

dyene nde Lepi Njambiyε. ¹⁴ Ngil menjon me dyambi te yi dyobo bejwa nye kon ne kon. Botu bete bendima wumna beyanga. Bo lehma kimɔ wumna melambo ne mbon mbon. ¹⁵ Wete ngwele ngwele kafa punduma ke numbu ne, na lajsa ne mekando me botu be meneti maka. A ta biye njambala te yi sumba namo ne bo. A ta sɔpite sendi menjam mete yi tedye nyanawe ngambi Njambiyε te ε ne ngungudye hene ko. ¹⁶ Wete dino ba ketinate ke lambɔ ne ne ke bey ne nde Kumande bekumande, Baba Mboko te ε lajsama bebaba mboko.

Kasi nyanawe dyambi te

yi ta kwanja ké

¹⁷ Ke konte, ε mi beje wete jaki Njambiyε ke teri ke misi me yeso. E nye kembidya detinate lepɔ nye benon hene be je ne mbiyon ke kwey baka nde: «Ne njâki, wune ngbôku wesidya nje dye nyanawe dina Njambiyε. ¹⁸ Ne ngbôku nje dye membundo me bekumande ne membundo me bekum besoja. Ne ngbôku nje dye membundo me be ngabolo bomɔ ne membundo me beyanga ne yi botu bete be bende bo baka. Ne njâki nje dye membundo me bomɔ hene, ko bomɔ bete be yeti bebala ko bebala ko bonosike ko betomba, ne njâki nje dye membundo me botu bete hene.»

¹⁹ E mi beje nyamo ko ne bekumande be meneti maka ne menjon me dyambi man. Bo wesidyama yi nje lu dyambi ne mo te ε ba ke to yanga ko bene njon dyambi ne. ²⁰ Ke konte, ε bo kwabe nyamo ko bene mo punja melepi me ja ε

dikima kelo meyekambiye ke mbombu nyamo ko ko. A dikima kelo meyekambiye, jatidyε ne botu bete be ba ne yo nyamo ko ke yotu, kano sendi yekambiye ne baka ke beya nje. E bo bu bo hene yiba bete ne jon ke mato dite kome piti lole ke.
²¹ E bukwe bomo te bari sombe son ne nje kafa te yi punduma ke numbu mo te e ba metidyε ke to yanga ko. E benon hene hokuma membundo man dito.

20

Bo ta kanje Satan

yaka sew tomay wete

¹ Ke konte, e mi bene wete jaki Njambiyε ke piye wule dyobo. A ba ne njango hebebe gbonjo ndon ne wete nyangwe kol sumba ke bo. ² E nye biye ngando ko. Bo jebangwe nye nde Njombu nyone, yina nde *Kum beya mekele, yina nde *Satan. A biyima nye woto yi yaka ndingele mesew tomay wete. ³ E jaki bu nye bete ke moy hebebe gbonjo ndon, difo numbu te ndadye nye kete ne gbem, kamba a me nje ke mbombu jatidyε mekando me botu be meneti maka ke yina nje kumo nde, mesew tomay wete siki kwa. Yo kponate nde, bo ta nje sone bo ne nye yi yaka mono ngimo.

⁴ E mi bene mesiya bekumande, bene sendi bomo ke nje diyō metidyε kete. E Njambiyε nye bo deti te yi peso josi bomo. E mi bene mesisin me botu bete yi bo kilma to yan baka. Bo woku bo, keto bo lepima nde, Yesus gbate kumande, lepō sendi melepi me Njambiyε. E mi bene sendi

mesisiŋ me botu bete be ti kanε ko nyamɔ ko ko yekambiye ne baka. Bo ti be ne yo ne ke membombu man ho ke mebo man na. Bo hene nja ju ne kɔkɔ, ε bene be *Krist name ke mesew tomay wete. ⁵ Bosa womiya bomɔ, yori. Ma bari ti womiye na, bo diyma kumɔ nde, mesew tomay wete siki kwɔ. ⁶ Botu bete be ta womiye ke bosate yite baka ne mesosa. Njambiye tokuma bo nde, bo bɛki botu bene. Soŋ te ε njime ti kpoke se bo na. Bo ta be botu be nyena sadaka be Njambiye nɛ Krist. Bene be Krist ta namɔ ke mesew tomay wete.

Njambiye ke pesɔ jɔsi Satan

⁷ Ke mesew tomay wete si kwɔ, bo ma soŋe bo ne *Satan punje nye ke jɔbo ne. ⁸ A ta pundo womete yi kɛ jatidye mekandɔ me bomɔ hene ke beya nje. A ta kɛ ke meboku me meneti maka yini, bo jɛbangwe yo nde Gɔk nɛ Magɔk. A ta ŋgbɔ bo, nɛ bo kɛ lu dyambi. Bo ta be budyate nda mesey me man. ⁹ E botu baka nyanja ke to meneti maka hene, lito mbey diyo te yi botu be Njambiye nɛ dya te yi temɔ Njambiye biyma kɛ. Yasi wete, ε dɛte wule pele kwey balɔ ke to yan girise bo. ¹⁰ E bo nje biye *Kum beya mekele, nye mɔ te ε dikima jatidye bomɔ ke yiŋa menje kɔ, bete ke matɔ dɛte te yi ne piti kete kɛ. A ka dolɔ nyamɔ ko bene mɔ punja melepi me ja ko mate. Bo hene ta sangwa ne nyanŋwe mebone mate kpo ne kpo tu nɛ yesɔ.

Njambiye ke pesɔ njena jɔsi

¹¹ Ke kɔŋte, ε mi beŋe sendi wete nyanɔwe wumna siya bekumande nɛ mɔ te ε bɔ metidyε kete kɔ. Ε meneti bene dɔɔɔ jise lɔndɔ ke mbɔmbu nε, yambile bɔne nε ηɔɔt. ¹² Ε mi beŋe botu bete be ma gwe baka, betomba nɛ bɔnɔsike ke teri ke mbɔmbu siya bekumande. Ε wete mumɔ bute yiŋa mɛkana. Ε nye nje bute wete mɛkana sendi. Mɛkana mete mbete, yo mɛkana mete yi jɔŋɔwe. Njambiyε pesima mɛlɛpi mε botu bete be gwɔ baka beŋɔwe mɛkele man, beŋɔwe yasi te yi bɔ ketinate ke mɔy mɛkana menɔri kε. ¹³ Botu bete be gwɔ ke maŋ baka, maŋ punja bo. Sɔŋ nɛ dya bemuŋ punja sendi botu bete ban. Njambiyε pesima jɔsi mumɔ hene beŋɔwe mɛkele mene. ¹⁴ Ke kɔŋte, ε bo biye sɔŋ nɛ dya bemuŋ bete ke mato dite. Sɔŋ te ε ta nje sendi njime kɔ, yori, mato dite. ¹⁵ Mumɔ hene te yi bo ti dole dino dyene ketinate ke mɛkana mε jɔŋɔwe, bo betima nye ke mato dite.

21

Njambiyε ta kusɔ jɔnja dɔɔɔ

nɛ jɔnja meneti

¹ Ke kɔŋte, ε mi beŋe jɔnja dɔɔɔ nɛ jɔnja meneti, keto bosa dɔɔɔ nɛ bosa meneti yambila bɔne, maŋ ti be se na. ² Ε mi beŋe dya te yi Njambiyε, jɔnja Yerusalem ke piye wule pε yi Njambiyε ke dɔɔɔ. Njambiyε kombila yo mberi yaŋa nda ηɔɔndu nya te ε kombile yotu yi nyiŋe nε tu gwaki kɔ. ³ Ε mi woke wete detina men ke lɛpɔ wule ke siya bekumande nde: «Nε bɛŋa,

mbey te yi Njambiyε dīye kete benε bomɔ ké, yoke. A ta dīyɔ benε bo. Bo ta bε kando dīyε. Njambiyε nε nguru wenε ta bε benε bo, a ta bε Njambiyε wan. ⁴ A ta titɔ misidyε hεnε kε misi man. Ko sɔŋ tí bε se na, ko mejaba ko wona yotu ko mebɔnε tí bεŋna se na, kεto bosa meyasi ma si yambile bɔnε.»

⁵ Ε mɔ te ε bɔ metidyε kε siya bekumande kɔ lεpε nde: «Bεŋa, mi kε kelɔ meyasi hεnε jɔnjate.» Ε nye lεpε sendi nde: «Kεtɔ mεlεpi maka, kεto mεlεpi mεte gbakasi, yo ta kwanŋna gbate dεte.» ⁶ Ε nye lεpε nye mi nde: «Meyasi hεnε sima kelna. Mi alfa,*f1* mi sendi omega,*f1* kandina meyasi nε sidya meyasi. Mɔ te ε gwe yesidyε, mi ta nye nye mɔrɔku mεte yi wulε kε ηgε te yi nye mumɔ jɔŋgwe ké nε gbεlate. ⁷ Mɔ te ε ta laŋsa kɔ ta bε nε meyasi mεte. Mi ta bε Njambiyε wenε, a má bε mɔnɔ wombe. ⁸ Yasi wεtε, nduku mesay mε botu bε wɔ nε yi botu bεte bε yeti kε tiko temɔ kε yi Njambiyε baka ta bε nyεŋ nyεŋ matɔ dīte kome piti lolε kete ké. Yo ta bε sendi nduku mesay mε botu bεte bε kelε mεkele mε nyε nε botu bε wona bomɔ nε botu bε kelna mεwanja nε botu bε kelna mεkele mε kifi. Botu bε kanε yiŋa meyasi tiko Njambiyε baka nε botu bε ja hεnε ta bε nε kiya sol te. Sɔŋ te ε ta nje njime kɔ, yori.»

Kasi jɔnja Yerusalem

⁹ Kε kɔŋte, ε wεtε jaki Njambiyε nje kε yembe. A bɔ kε njoka bεjaki yitan jɔ yiba te bε bɔ nε mεpelɔ yitan jɔ yiba baka. Mεpelɔ mεte bɔ nε njena mεkemiyε yitan jɔ yiba kete nε ηgbεŋ. Ε

nye lɛpɛ nye mi nde: «Inja, nɛ mi tedye wɛ nya te yi *Mɔnɔ Sam ta bɔ nɛ mɛgwaki kɔ.» ¹⁰ Ɛ nye bɔ mi nɛ nje te yi sisin kɛ nɔ kɛ wɛtɛ nyanɔwɛ dɔŋna keki. Ɛ nye tedye mi Yerusalem te dya Njambiyɛ. Yo bɔ kɛ piyɛ wulɛ kɛ yi Njambiyɛ kɛ dɔyɔbɔ nɛ meluksa mɛnɛ. ¹¹ Meluksa mɛ Njambiyɛ bɔ kɛ kelɔ nde, Yerusalem pɔn pɔn kɛ misi. Yo bɔ kɛ pɔn nɛ ŋɔy ŋɔy nda wɛtɛ kɔpasa tari te yi nɛ ŋɛlɛlɛ yi bɔ jɛba nde japi kɔ. ¹² Wɛtɛ nyanɔwɛ dɔŋna ndoko linja dya sanɔwɛ. Ndoko te bɔ nɛ mɛnumɛy kamɔ jɔ yiba. Bejaki bɛ Njambiyɛ kamɔ jɔ yiba bɔ kɛ teri yaka nɛ mɛnumɛy mɛtɛ. Mɛdɔnɔ mɛ mɛkandɔ mɛ botu bɛ Isarayɛl kamɔ jɔ yiba bɔ ketinate yaka nɛ mɛnumɛy mɛnɔri. ¹³ Mɛnumɛy yitati bɔ pulɔ komɛ yesɔ pundɛ kɛ. Yitati bɔ pulɔ ŋgari, yitati pulɔ njɛmbɔ, nje bɔ sendi yitati pulɔ komɛ yesɔ balɛ kɛ. ¹⁴ Bɔ summa ndoko te nɛ nyanɔwɛ mɛtari kamɔ jɔ yiba yɛ sukɛ yo nda sanɔwɛ kondu. Mɛdɔnɔ mɛ botu bɛ tomun bɛ *Mɔnɔ Sam kamɔ jɔ yiba bɔ ketinate yaka nɛ mɛtari mɛnɔri. ¹⁵ Jaki te ɛ bɔ kɛ lɛpina nye mi kɔ biyima yinɔ kum sɔŋ kɛ bɔ yɛ yekina yasi. Kum sɔŋ te bɔ tandɛ lɔr. A biyima yo kɛ bɔ, na yeki nɛ dɔkɔ dya, yekɔ mɛnumɛy nɛ ndoko te yi linje dya kɛ. ¹⁶ Sɛwɔ dya nɛ dɔkɔ mɔy te bɔ ndi wɛtɛ. A bɔŋma kum sɔŋ yinɔri yekɔ nɛ dɔkɔ dya. Ɛ nye kwedya sɛwɔ te kilomɛta tomay yiba jɔ gɔmay yiba. Dɔkɔ mɔy te nɛ dɔ te bɔ ndi sendi dɛtɛ. ¹⁷ Ɛ jaki yekɛ sendi dɔ ndoko, kwedya nde, yo mɛta kamɔtan jɔ kaba jɔ yiba. A yekima yo nda yi bɔmɔ diki yekɔ nɛ mɛyasi

ké. ¹⁸ Ndoko te ɓa sumnate ne yiɓa kɓasa tari nde japi. Ndingele dya ɓa hene tande lor ne seɗgeleɗ. Yo ɓa ke panɔ nda kimɔ mɔjoli. ¹⁹ Bo kombila wɔmɔ nyangwe metari me ndoko yi ɓa nda saɗwe konu ké nɛ kwalɔ kɓasa metari hene. Bosate ɓa ne wete kɓasa tari nde japi, yibate ɓa ne wete tari nde safir, yitatite ne wete nde kalsedɔɗ, yinite ɓa ne wete tari nde emerod. ²⁰ Yitante ɓa ne wete tari nde sardonik, yitan jo wete ne wete kɓasa tari nde sarduwan, yitan jo yibate ne wete nde kirisolit, yitan jo yitatite ɓa ne wete tari nde beril, yitan jo yinite ne wete tari nde topase, kamote ɓa ne wete tari nde kirisoparase, kamɔ jo wete ɓa ne wete kɓasa tari nde hiyasinte, kamɔ jo yibate ɓa ne wete nde ametiste. ²¹ Menumeɗ maka kamɔ jo yiba ɓa kɓasa yiɓa meyasi nda membambo kamɔ jo yiba. Bo kelma numey hene ne kɓasa yiɓa yasi wete nda mbambo. Ndingele mambaɗo me dya hene ɓa tande lor ne seɗgeleɗ. Yo ɓa ne ɗgelele nda mɔjoli. ²² Ko mi ti beɗe mbanjo Njambiye ke moy dya te na, keto yo Baba Mboko te Njambiye e ne ɗɗuɗɗuɗye hene ko, yo nye ne ɗguru wene bene *Mɔnɔ Sam be mbanjo Njambiye te yi dya te. ²³ Dya te yeti ke pa diye nde, yeso bene ɗgwende nyêki mejasi kete na, keto yo nyangwe meluksa me Njambiye nye mejasi ke dya te. Lambo dya te, yo Mɔnɔ Sam. ²⁴ Mekandɔ me botu be meneti maka hene ta kendɔ ke mejasi mene. Bekumande be meneti maka ta nje ne mekusuku man yi nye bo luksa te hene. ²⁵ Kande bemeɗmene kumɔ bekoko ko menumeɗ me dya

te tí díbina se na, keto ko tu tí beɲna se na. ²⁶ Bo ta bú meyasi hene te yi nye botu be meneti maka luksa nè yi kele nde, bo sômbila bo ké nje nɔ ke dya te. ²⁷ Ma ko yiɲa mekele me memi, ko botu bete be kele mekele me nyɛ nè ja baka tí nyiɲe ke dya te na. Siya botu bete be ta nyiɲe, yo ndi baka be dɪnɔ dyan ketinate ke mekana me jɔngwe te yi Mɔnɔ Sam.

22

¹ Ke kɔnte, ε jaki Njambiyɛ kɔ tedye mi wete nyanɔgwe duku te yi ne mɔrɔku mete yi nye jɔngwe ké. Mɔrɔku mete ba ne nɔɲɛ nɔɲɛ, pupɔ nda wete wumna tari nde kirisital. Duku te sɔkulanɔgwe wule ke siya bekumande te yi Njambiyɛ diyɛ kete bene *Mɔnɔ Sam ké. Yo sɔkulanɔgwe beɲgwe bembe mbaɲgo dya. ² Jɛti te ε nye bomɔ jɔngwe kɔ ke meɲɔ me duku kɔ hene yiɓa. Sew wete, yo wúm meɲga kamo jo yiɓa. Yo wúm meɲgwende hene. Membɔru mete síɔyikwe mekɔn me mekandɔ me bomɔ hene ke to meneti. ³ Ko mekita tí beɲna se na. Siya bekumande te yi Njambiyɛ bene *Mɔnɔ Sam ta diyɔ ke moy dya. Botu be mesay bene ta kelo mesay nye nye. ⁴ Bo ta beɲe mbombu wene, dɪnɔ dylene ta be ketinate ke membombu man. ⁵ Ko tu tí beɲna se na. Ko bo tí diyɛ ko lambo ko yol yesɔ na, keto Baba Mbokɔ te Njambiyɛ ta be mejasi man. Bo ta namɔ kpo ne kpo.

Yesus nde, a yima

⁶ ε jaki lepe nye mi nde: «Melepi maka gbakasi, yo ta kwanɲa gbate dete. Baba Mbokɔ Njambiyɛ

te ε nye botu be punja mɛlɛpi mɛnɛ sisɪŋ nɛ kɔ tomɛ jaki wɛnɛ ndɛ, a njâki nje tedye mɛyasi mɛtɛ yi yâkɔŋwɛ dya nedɔ ké nye botu be mesay bɛnɛ.» ⁷ Kumande Yesus ndɛ: «Bɛŋa, mi yima nedɔ! Mɔ te ε bakidye mɛlɛpi mɛtɛ yi Njambiyɛ punja kɛ mɛkana maka ké nɛ mɛsosa.»

⁸ Yo gba mi Jan woke, bɛŋɛ sendi mɛyasi mɛtɛ. Kɛ mi ma si wokɔ bɛŋɛ mɛyasi mɛnɔri ké, ε mi balɛ kɛ nji mɛkol mɛ jaki te ε tedya mi yo kɔ, né mi kan nye. ⁹ Ma yasi wɛtɛ, ε nye lɛpɛ nye mi ndɛ: «Ay, wɛ tɪ bɔbɔ! Mi ndi kumbɔ wɔ kɛ kiya mesay, kumbɔ bɛmɔŋ bɔ, botu be punja mɛlɛpi mɛ Njambiyɛ nɛ baka hɛnɛ be bakidye mɛlɛpi mɛtɛ yi yo kɛtinate kɛ mɛkana maka baka. Kanɔ ndi Njambiyɛ.» ¹⁰ E nye lɛpɛ nye mi ndɛ: «Kpɛ, wɛ tɪ sɔɔyukwɛ mɛlɛpi mɛtɛ yi Njambiyɛ punja kɛ mɛkana maka ké na, kɛto ŋgimɔ sima wuta. ¹¹ Ma mɔ te ε keɛ kɔtu mɛkele, a kɛn mbɔmbu yɪ kelɔ dɛtɛ. Mɔ te ε keɛ mɛkele mɛ mɛmi, a kɛn mbɔmbu yɪ kelɔ dɛtɛ. Ma mɔ te ε keɛ ŋgbɛn mɛkele, a kɛl dɛtɛ kɛ nɔ mbɔmbu. Sendi, yɔkɔ ε bakidye yotu nɛ pupunate kɛ misi mɛ Njambiyɛ, bɛŋgwe nye kɔ, a kɛn mbɔmbu kelɔ dɛtɛ.»

¹² Kumande Yesus ndɛ: «Bɛŋa, mi yima nedɔ! Sol te yi mi nɔ ké kɛ bɔ mbɛ yɪ solɔ mumɔ hɛnɛ bɛŋgwe mɛkele mɛnɛ. ¹³ Mi alfa,*f1* mi sendi omega.*f1* Yo mi diyɛ bosate, diyɔ njenate, kandina mɛyasi nɛ sidya mɛyasi. ¹⁴ Botu betɛ be weyɛ mɛlamɔ man baka nɛ mɛsosa, yo bɔ ta bɛ nɛ ŋgabiyɛ kɛ mbumɔ jɛti te yi nye mumɔ jɔŋgwe ké. Bo ta kwɔ nɛ numɛy yɪ nyɪŋ nɔ kɛ moy dya. ¹⁵ Botu betɛ be keɛ yasi nda bɛmbiyɛ

baka ta bɔnɛ nɛ nan kinɛ nyinɛ moy dya na. Botu bɛ kelna mɛkele mɛ kifi nɛ botu bɛ kelna mewanja nɛ botu bɛ wona bomɔ ta tika nɛ nan. Botu bɛte bɛ kanɛ yinɛ meyasi tiko Njambiyɛ nɛ botu bɛte bɛ nyɛ sosu kɛ kelna ja baka, bo hɛnɛ ta bɔnɛ nɛ nan sendi.

¹⁶ «Mi Yesus, yo gba mi tome jaki wombe nde, a kɛn kɛ lɛpɔ meyasi mete gbate gbate nyɛ wunɛ kɛ njoka menjon mɛ bomɔ hɛnɛ bɛ tike temɔ kɛ yembe baka. Mi njuku jeti, nday Davit, sisɔ te ɛ panɛ nɛ kpalele kɛ njenamɛnɔ kɔ.» ¹⁷ Kimɔ Sisin nɛ nya gwaki kɛ lɛpɔ nde: «Inja!» Mɔ te ɛ woke mɛlɛpi maka kɔ lɛpi nde: «Inja!» Mɔ te ɛ gwe yesidyɛ, a njâki. Mɔ te ɛ kwadyɛ hɔbiye mɔrɔku mete yi nyɛ mumɔ jonɔwɛ, a hɔbiya yo lalɛ nɛ gbɛlate.

Njena lɛpi

¹⁸ Mi Jan kɛ pele nyɛ mumɔ hɛnɛ ɛ woke mɛlɛpi mete yi Njambiyɛ punja kɛ mɛkana mete yɔkɔ kɔ nde: Nɔgɛ mumɔ dokidyɛ yinɛ yanɛ kɛ to mɛlɛpi maka, Njambiyɛ ta kelɔ nde, a sɔngwanɔwɛ nɛ mɛkemiye mete yi diyɛ ketinate kɛ mɛkana maka kɛ. ¹⁹ Ma nɔgɛ mumɔ sɔnɛ yinɛ yasi kɛ mɛlɛpi mete yi Njambiyɛ punja yi diyɛ ketinate kɛ mɛkana maka kɛ, Njambiyɛ ta sɔnɛ sendi nɔgabiye te yi mɔ te diyma bɛ nɔ kɛ jeti te yi nyɛ mumɔ jonɔwɛ kɛ. Njambiyɛ ta kelɔ sendi nde, mɔ te tɪ nyinɛ kɛ dya Njambiyɛ na. Kasi jeti te yi nyɛ mumɔ jonɔwɛ nɛ kasi dya Njambiyɛ ketinate kɛ moy mɛkana maka.

²⁰ «Mi Kumande Yesus, mi mɔ te ɛ jaye gbate nde, meyasi mete hɛnɛ gbakasi kɔ kɛ lɛpɔ nde:

Mi yima nedɔ!» *Amen, Kumande Yesus, inja!
21 Kumande Yesus kêl ngikwa ne wune hene.

Μελεπι με Njambye Jonja Mbon
Kako: Μελεπι με Njambye Jonja Mbon New
Testament
Le Nouveau Testament en langue kako (kako-est)
Cameroun et RCA

copyright © 1999 Wycliffe Bible Translators, Inc.

Language: (Kako)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

01d5712f-3809-5574-9928-b20d539536e3